




本朝別記全書



禮部

學政第六

學政全書

順治八年三月禮部題定為申飭學政事照得人才出于學校教育責在學臣今

皇上好學崇文正多士嚮風之日尤宜嚴加申飭謹將切要事宜開列上請

一學臣舊有考覈之例今後督學御史提學道必歲科兩試俱週臣部考覈稱職御史各都察院回道管事道臣各吏部照常陞轉外任其公明尤著者照舊例題請優陞京堂徇私溺職者叅處



一學臣舊官候考新官未補中間易致曠廢學政除督學御史報代自有臺規凡學道兩考完日先報臣部卽咨吏部銓補新官依限赴任面相交代以杜署道諸弊其舊官聽候考覈陞轉處分

一學臣到任卽將日期報部以到任日爲始歲考限十二個月考完每三個月解卷一次科考分四次解卷臣部會同禮科磨勘所取生童文字以純正典雅爲主如有詭恠舛謬者除本生叅革外學臣請

旨處分凡解卷一次磨勘四卷以下每一卷罰俸三個月至五卷以上每二卷降職一級十卷以上革職

一各直省生員不許聚衆結社糾黨生事及濫刻選文窓

稿如有犯者聽臣部禮科糾叅重處學臣以失職論

一教官生員不遵教條生事違法者學臣嚴行懲究若與武職兵丁有爭教官生員聽學臣處治武職兵丁聽該管衙門處治不許生員結黨爭抗

一各直省學臣不宜久缺失教各撫臣務將見缺盡數題報請下吏部選補以前有不由科貢出身冒濫教職者一併題明送部別用若部選教官未到止許本學及別學官署事不得濫委雜流 以上六款乃學政要務伏候

命下通行遵奉尚有舊行學政全書容臣部刪定行文申飭奉旨依議申飭行該部知道

臥碑

順治九年二月禮部題定奉

欽作刊立臥碑曉示生員

朝廷建立學校選取生員免其丁糧厚以廩膳設學院學道學官以教之各衙門官以禮相待全要養成賢才以供朝廷之用諸生皆當上報

國恩下立人品所有教條開列于後

一生員之家父母賢智者子當受教父母愚魯或有非爲者子既讀書明理當再三懇告使父母不陷于危亡

一生員立志當學爲忠臣清官書史所載忠清事蹟務須互相講究凡利國愛民之事更宜留心

一生員居心忠厚正直讀書方有實用出仕必作良吏若

心術邪刻讀書必無成就爲官必取禍患行害人之事者往往自殺其身常宜思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司官衙門不可輕入卽有切己之事止許家人代告不許干與他人詞訟亦不許牽連生員作証

一爲學當尊敬先生若講說皆須誠心聽受如有未明從容再問毋妄行辯難爲師者亦當盡心教調勿致怠惰
一軍民一切利病不許生員上書陳言如有一言建白以

違制論黜革治罪

一生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

學政條約

一提學官須正己潔操矢公矢慎務得真才不許曲徇情面考試生員必嚴加校閱如有荒疎庸毫不堪作養者卽行黜退不許姑息有捏造流言思逞報復者訪實照例問遣童生入學遵近題事例大學四十名中學二十五名小學十二名或遇人才偶乏寧缺額勿濫收發案後不再試一人不再發一案亦不許別立寄學名色若鄉宦勢豪干託不遂暗行中傷者許徑自奏聞處治

一府州縣提調官員宜嚴束生徒按季考校凡學內殿堂齋房等屋損壞卽辦料量工修理其齋夫膳夫學糧學田等項俱要以時撥給不許違悞刻減生員之家照例優免除干謁瀆擾外俱宜以禮相待勿得橫肆凌侮至于非禮諂諛嚴行禁革

一儒學教官士子觀法所係按臨之日考其學行俱優教有成效者除禮待獎賞外仍據實列薦其行履無過但學問疎淺者姑行戒飭責令勉進有老病不堪者准令以禮致仕若鑽營委署橫索束修卑汙無耻素行不謹者不必試其文學卽行叅奏分別革究其有學霸生員書役門夫行私惑誘者一併究擬治罪

一孝弟廉讓士子立身大節其有敦本尚實行誼表著者

提調官細加體察取其本學師生及本族里隣甘結申送
提學覈實卽加獎賞以勵頽俗若有平日不務學業囑託
把持武斷包攬或捏造歌謠興滅詞訟及敗倫傷化過惡
彰聞者體訪得真不必品其文藝卽行革黜但行優者不
許通同賄冒行劣者不許徇情姑息並不許輕信開送致
被挾私中傷違者一併從重叅處

一說書以宋儒傳註爲宗行文以典實純正爲尚今後督
學將四書五經性理大全蒙引存疑資治通鑑綱目大學
行義歷代名臣奏議文章正宗等書責成提調教官課令
生儒誦習講解務俾淹貫三場通曉古今適于世用其有
剽竊異端邪說炫奇立異者文雖工弗錄坊間書賈止許

刊行理學治政有益文業諸書其餘瑣語淫詞及一切濫
刻憲藝社藁通行嚴禁違者從重究治

一該管有司官于諸生進見須設立門簿詳悉填造或公
事或私事悉登姓名或自搆訟或爲人訟或自爲証或被
牽証全載情節共有事不干已輒便出入衙門乞恩網利
議論官員賢否者許卽申呈提學官以行止有虧革黜若
糾衆扛帮聚至十人以上罵詈官長肆行無禮爲首者照
例問遣其餘不分人數多少盡行黜退爲民

一各提學官督率教官生儒務將平日所習經書義理着
實講求躬行實踐不許別創書院群聚徒黨及號招他方
遊食無行之徒空談廢業因而起奔競之門開請託之路

違者提學御史聽都察院處分道臣聽巡按御史劾奏遊士人等問擬解發

一歲科兩考定以二年內報完方許陞轉仍候新官面代不許竟離地方考試之日務須親臨遍蒞不許移文代委及隔別府分調取生儒以致跋涉爲害亦不許令師生匍匐迎送考畢卽于本地方發落明示賞罰不許攜帶文卷于別處發案致令吏書乘間作弊士子無所勸懲違者題
叅

一詐冒籍貫投充入學及有詭寫兩名隨處告考或假捏士夫子弟希圖進取或係倡優隸卒之家及曾經犯罪問革變名易姓等弊僥倖出身殊壞士習訪出嚴行究問革

黜若教官納賄容隱生員扶同保結者一體治罪革罷更有一種冒名頂替換卷代筆之徒尤屬傷風敗類臨時倍加嚴查重治

一試卷以優等大學五名小學三名解部以憑磨勘其有詭僻幽險割裂補綴磨勘出照近題卷數分別叅處解卷之時必用原本真卷不許改騰潤色又必卷冊併解冊內務將生員優劣其取進新生姓名數目備造不許遺漏差誤解期務照近題次數不許遲延違者查叅

一考貢照近日事例每歲預將次年應貢生員屢經科舉者三人一正二陪嚴加考選或年衰文謬不許濫取如正貢不堪或以生員告老則取陪貢至于一陪不堪更及二

陪共有停廩降廩者歲考居三等亦准收復未收復者不許起送應貢其應貢者定限次年三月到齊聽候四月十五日廷試如有濫貢及廷試發回五名以上提學照例降罰

一補貢有缺務查人文未經到部果在一年以裏者將原給批咨硃卷追繳方挨次取年力精壯文學優長者一人補貢定限該貢年分次年到部方准收考如有不遵舊例將年遠貢缺濫補市恩者起送到部即將本生發回革廩肄業提學官叅究

一遇鄉試年分應試生儒名數各直省每舉人一名止許取科舉三十名監生亦依解額照數起送有多送一名者

各監試官徑行裁革不許入場如取送過多查究叅處

一提學官奉 勅專督學校各撫按二司官不許侵伊職

掌行事提學官巡歷所屬除教官生員干犯行止合行嚴

懲外不許泛受民詞侵官喜事其生員犯罪或事須對理

者聽該管衙門提問不許護短曲庇致令有所倚恃抗拒

公法

一名宦鄉賢孝子節婦及鄉飲禮賓皆 國之重典風教

所關今後提學官遇有呈請務須核實確據非年久論定

者不得舉鄉賢名宦非始終無議者不得舉節婦孝子非

鄉里推服者不得舉鄉飲賓介如有妄舉受人請求者師

生人等卽以行止有虧論其從前冒濫混雜有玷明典者

徑自查革

一考試出題須要明白正大不得割裂文義以傷雅道至于文章等第原有定評以後督學批語宜從簡質或平正或明暢或典實或爾雅各視其文母生枝葉亦省工夫專校閱之一助

一淡薄質素吾儒家風如以浮靡輕佻相高縱酒宿娼蕩閑越檢自等于市井年少之輩有犯必黜不得少貸凡遇聖節元旦冬至丁祭一應禮儀務要整齊嚴肅有高臥不赴及參錯驕蹇者卽行責治至于謁見上官毋失禮毋足恭要須循循雅飭師生教學胥此可覘矣

一社學卽古家塾黨庠遺意養蒙育德所關不小近見多荒劣老生不識字義無分句讀入門一差終身難改今後提調官當加意作興每鄉置社學一區仍曉諭現在社師及願充者齊集赴考果文義通曉行誼謹厚者方准充補免其差役量給廩餼以優贍之不堪者卽行革退督學按臨之日併約正副姓名冊報查考

考試事例

一憲綱冊凡不關學政者不必槩造其式首提調正官次佐貳首領履歷教官備造履歷仍開習某經各官下註在任公出等字以便接見見時免用手本次鄉賢名宦見在祀者各爵里姓名行實并奉到某督學明文次旌獎過孝子順孫義夫節婦各姓名年歲籍址行實係何人舉報并

奉到某督學明文次先聖先賢祠墓次鄉士大夫各開履歷爵里名號及見任致仕丁憂養病等項及舉貢監生舉人仍註某科次有無山林隱逸懷才抱德之士次請舉鄉飲賓介行實姓名及某人保舉次社圃社學鄉約址所教讀約正副姓名次學田地畝廩房租稅數目次本郡州縣山川圖誌名賢著述書籍碑刻古蹟以上各爲一欸一格眼冊提調官督令該學查照舊式將通學生員年貌籍貫三代所習經書及某年月日入學某年月日考取幾等幾名中間補廩補增停降發社收復科舉及丁憂緣事改名給假患病等項挨年順月逐一開明內廩增附青社各以資次爲序標停未降者附廩未降增附者列增附前

增未降者列增後降附者列附前緣事者要見會否歸結患病給假者原限何時復學丁憂者何時服闋累次未經歲試者原係何因改經收學改名者原入何學原習何經原係何名問革者奉何衙門批問但要各生親筆填註不許吏書代書中有差錯各生任之惟患病給假許吏書查實代書候本生復學用紙大如格眼親書繳送以便更貼其武生寄學者亦照式填註冊末凡舊案有名今中式應貢告老病故援例等項未經除名者俱明白開欸附于冊後上用提調印下用儒學印候考較到一月內差人解閱如有錯漏增減及隱匿事情者教官議處吏坐贓究革案驗到有告改名改經者一切禁止以省混擾

一便覽冊查照舊規開造通學生員若干內廩增附青社等項各若干名見在聽考若干名丁憂患病等項若干名必總撒相合其前案幾等生員幾名科舉幾名賞格幾名行優行劣幾名童生入學儒士科舉各若干名送考遺才若干名取科舉若干名止具總數并五科內鄉試及十年以內所出過題目候出巡下馬日送一官員賢否遵照

勅諭例應品覈文到各府州縣掌印官卽照舊式備造僚屬履歷及以前獎薦戒飭緣由填註考語事實教官更分年立志行學識教規四款內有賢不肖之尤者另具揭帖限一月內送閱按臨再送新任及改節改過者季終續報縣正

以上將任內作興學校事跡備申報奪儒學掌印官遇有陞遷及會試等事故提調官卽查年深訓導委署一學俱缺卽將別縣附近者詳委一應經手書籍器物學糧文卷交盤明白申報批允方許離任如應聘及丁憂等項查無違礙一面准行一面申報各州縣署印勿得輕委教官卽承委乏用亦須申詳督學批允方行止守倉庫勿干別事各府州縣禮房吏及學吏轉考俱候詳允方准起送違者究革

一考案一等文理平通增附青社俱補廩無缺附青社先補增無增缺青社先復附仍各候廩原廩增停降者俱准收復照序補廩二等文理亦通增補廩附青社俱補增無

增缺青社先復附原停廩降增者俱准復廩廩增降附者
止准復增候補不准補廩三等文理畧通賞罰俱無原停
廩者照例准收復候廩其丁憂起復病痊考復緣事辯復
及原增降附者亦准復照新舊間補青衣發社者准復附
廩已降增者不准復四等文理有疵廩姑免責照例停廩
不作缺限六個月送考定奪原係停降者不准限考姑照
舊青衣發社者不准復仍同增附各樸責五等文理荒謬
廩停作缺原停廩降增增降附附降青衣青衣發社原降
增降附者照增附遞降俱候歲考定奪原發社者徑黜爲
民六等文理不通廩膳十年以上發附六年以上與增廣
十年以上發本處各充吏不願者聽餘俱黜退爲民內補

廩進學未及六年者姑發社作養

一幫補新舊相間考案爲新丁憂起復病痊考復停降考
復緣事辯復爲舊無新儘舊無舊儘新而新舊總以考案
先後爲主如第一是新則先新後舊第一是舊則先舊後
新丁憂以下四項考居一二等者俱照名次先後爲序卽
起復亦不問服闋先後惟考居三等先儘下憂起復次病
痊考復次停降考復次緣事辯復換次序補如起復等項
有一二人同時候補者以明文到日先後爲序明文同到
者以原補廩先後爲序若考後有起復准復者序于與考
之後不得攙越缺出該學次日卽查係廩增某人某事故
見缺應補查得上首補過某行某人今該補某行某人下

首見有某行某人候缺仍明開缺出月日取具教官并本
生及上首下首生不致攙越賄囑結狀申提調官復勘無
礙申文詳奪仍照前明開以便批發該學若留難至三日
以上提調官處若遲至七日以上提吏典問罪補增亦如
廩例其增廣補廩遺下增缺須前詳允到方許作缺呈詳
頂補不得兩項並申如有朦朧攙越者事發教官以贓論
本生黜保結生降調

一歲貢正陪俱要屢經科舉者方准仍以食糧年深爲序
同補則以原考案爲序除停廩未復者緣事開糧者服闋
及告病給假過限不補考者服滿未補而緣事停降未復
而丁憂者俱扣筭作曠外其餘俱不作曠停降考復緣事

辯復者以文到日爲始准作實數降增而復補廩者准前
後通筭就中較其糧數年月最深者爲正貢其次以是爲
差每遇取考文到提調官取教官廩膳里隣合例甘結備
造年貌籍貫科舉次數起送考選出巡遇便投考考中領
文日卽開糧作缺若已領硃卷卽該年貢數丁憂患病不
另補如一年內人文未到部而病故問革者有司將原領
卷單追繳另送考選其領過盤費問革者追病故者免若
考後衰老荒疎不堪充貢者同致仕優免不補貢其有捏
添科舉隱匿停降及受賄讓貢爭貢者黜起送官吏俱查
究

一生員凡服闋者呈學轉提調官查無違礙照舊規取師

生里隣保結面試經書論三篇廩解卷詳奪增附青社徑
行學收復報驗過限三月申究半年廩作曠增附降革一
年黜凡告假者該學明開事由地方呈提調官轉詳批允
放行不得悞歲考違者黜果千里外未能卽回勘明取結
詳院限三月補考再違者黜凡患病者提調官取該學及
醫生甘結按臨半月前開報限三月內補考違限者青衣
徑黜廩停作曠增降附附降青衣再違三月俱黜無故臨
考不到者徑黜凡緣事者承問官一面取問一面申詳若
別衙門批允復學或問革俱抄招請詳非奉督學明文不
得收學不得除名按臨時除重犯候詳外輕罪與干証雖
未詳允俱送考不得槩造緣事避考廩膳緣事三個月以

上不結開糧不作缺事結供明准補支但問罪卽不犯革
亦備查拘發收復月日俱作曠不補支凡告改學改姓改
名改經者俱屬弊竇概不准果姓應歸宗名真犯諱與願
改春秋禮記者發落畢呈奪凡願告老者呈學轉提調官
查無違礙取結按臨半月前具申准行照例優免若已赴
考及緣事未結青衣發社與行止不端者不准凡批限補
考者違限半月掌印教官申報考附一二等者不准幫補
四五六等照案行凡補考者提調官面試經書論各一篇
卽將原卷固封令本生親齎送考對驗以防冒替等弊不
必教官伴送

一科舉通學有志者俱准送考優等幫補及劣等降黜亦

照歲考例行教官有志及在籍恩歲貢生監生願就本省鄉試者俱許與生員一體送考卷面書官字貢字監字另案發落生員雖取科舉而行止不端者重印革黜輕亦不准應試儒士必三場俱通者方准送試不許泛濫至考選遺才務照行取名數錄送其假滿病痊事結未經補考者不得混錄

一童生入學進身之始不可不嚴爲之防文到如州縣掌印官不係科貢出身申府另委先期曉諭報名取里隣甘結身家無刑喪冒替各項違礙方准收考每府各州縣關會一日同考府試亦類齊一日以防重冒其入學照舊例限數縣考取二倍府考取一倍科舉年送考儒士減十之

五多者截回該府考取已定一面先將名數揭具花名呈報一面榜示所取童生照次序五人爲一結取行優廩生親筆花押保結查照格眼冊式當堂令各童生照寫卷字樣親填年貌籍貫三代經書類爲一冊并各結狀粘送各童生填寫年貌務要一一肖真以便查對其點名手冊仍寫年貌有不對者革除每名仍開保結廩生姓名于下點名時廩生與同結五人互相覺察如有倩代等弊即時舉報容隱者連坐廩生黜革其府州縣原取真卷合釘封貯候發落日查對黜退生員原不係行檢而年資可進者提調官准與童生一體考選有別處寄學改回及稱遊學隨任等事另送者悉不准行入府學者即于各州縣內量撥

不必另送發案日再行覆試筆跡雖相同而文理不通者亦不准入學

一武生考較卽于考較文生後踵行取進武生無武學處照例屬文學教官管理其餘除劣行等事宜悉照文生例行除騎射外教以武經七書百將傳及孝經四書等俾知大義遇試考共騎射文義通曉者方准取補提調官仍將各學射圃修葺置脩弓矢教官率生員武生較射其中以飭武脩

一各府州縣奉到一應未完事件及缺官廩銀田租紙贖與稽考一應收補復學各項循環簿式及比銷事規俱照舊條例行未盡者不必另置以省煩費其學田租賦應給

贍貧等費務在嚴覈舉行俾沾實惠毋聽奸胥冒濫侵欺除通查各學田原額若干每年額租若干先造清冊報部外每年終將用過某費若干項贍過貧生某人若干名詳開舊管新收開除實在造冊申明以憑報部如冊報隱漏遲延賑濟虛名無實及教官學霸強豪之家私據侵占者查出按法追究

一出巡半月前行巡視學校紙牌三日前行起馬牌各提調教官遇紙牌到將應考生童冊籍併應行事宜逐一備完府提調官遇起馬牌到一面將各處生童數目開揭送查一面就近調取應考童生可足兩場者候考其餘俟下馬日品搭定期出示調取免致官生久候經臨地方巡捕

官量帶兵快于交界處防護

勅印其餘夫馬按臨伺候不得另批迎接官吏師生不許出郭
迎送程途非六十里不得備辦中火每飯葷素不得過五
器有驛州縣及非宿驛不必另送下程吏書馬繫椿自行
上下貼轎近行馬夫先送雨具不許近前兵快執肅靜牌
二面子執事前迴避牌二面子吏書前如遇紆曲巷途預
先屏人但有潛行探聽及乘機餽送吏書者即便拿究敢
有容令跪道投書稟見者巡捕員役重究該州縣原係何
官巡捕不許代替如違提吏究罪按臨下馬先將巡捕官
及修理衙門委官職名巡視人役姓名開揭送查
一駐劄衙門須寬大可試四五百人高垣厚壁環覆以棘

不許故留水道穴隙及假牆虛壁一切弊竇吏書房不得
近廚廁廚廁不得近巷市仍各總界一門以便封鎖門各
異鑰鑰各異牌仍總貯一櫃以便啓閉抄案門皂等房不
許與外房相接須隔一牆各備行皂淨器後堂正房務整
理潔淨一間安置床帳一間置淨几六張石硯筆墨水注
鎮紙燈臺燭架俱全堂上平鋪地板公座紗廚加高三尺
稍前仍置小公座以便接見堂下置水缸二長盤四磁礮
十以便倒換試場須高廠堅密可蔽風雨不留空隙不纏
柱結綵堂外以角道分東西以千字文橫列編號每額懸
粉牌一面大書某字號幾桌懸燈于上每桌前後左右相
去各二尺上置界石一下置湯器一桌脚用長桁編結以

防移動仍貼某字幾號于桌面桌盡號止卽照桌數置籤
東西分爲二筒每一號爲一束又備造一冊務要冊對籤
號籤對桌號下馬呈遞不許遺漏差錯堂左設桌二張候
放出題等書及照出手牌三十面旁設大雲板一架堂右
置長凳四條圍屏二架以便官吏暫處堂東西壁各備出
題長柄牌六面提牌八面小公座前直放長桌一張鋪氈
于上北首放移席換卷丟紙說話顧盼攙越抗拒犯規吟
哦不完小印十面總盛一櫃印色俱全中放東西文場坐
號籤筒南首留與教官用印兩旁各設受卷條桌一張分
置各府州縣學座牌在上每桌各置界尺四條呈文紙五
十張筆硯墨各一照進長柄粉牌二面月臺設小雲板一

架連槌在飲茶桌前飲茶桌一張橫放置茶四大壺薑湯
二壺上用紙帖明開薑茶字茶鍾六個冬春備火盆木炭
相連又設桌一張直放上置飲茶小印一面印色全界尺
四條以便放卷相離五尺甬道中又設木榜一架連槌在
出恭桌前出恭桌一張橫放上置出恭小印一面印色全
界尺四條以便放卷文場四隅各置粗壯桌一張銅鑼四
面以備巡綽人役站立瞭望左角門邊簾圍行皂中備食
盆水缸水桶及碗碟等物合用水菜俱全右角門邊置淨
筭四個俱用蘆簾編夾約高四尺上不用蓋以便遠觀不
許附近外牆二門內大門外各設大鼓一面前堂後堂高
燈八座甬路掛燈八盞二門大門高燈各四座二門內兩

邊暫用圍屏遮蔽設桌凳以備官吏輪流憇息事畢照數給領其合用五經四書性理通鑑綱目及小學武經七書等書教官先一日呈送完日領回

一按臨下馬執事卷損暫止大門外俟轎夫出把門官吏暫閉大門督學先入安置

勅印巡捕官入後堂檢視各房墻垣封鎖書吏出堂巡捕官同押損官驗交卷損次皂隸繳執事次掌印官送聽事員役柴燭等項驛官送廩給鋪陳總具一冊巡捕官搜檢收畢仍閉門更衣升堂各官吏師生序進遂起驛丞稟見各官師生先行兩拜禮舊規免拜者不稟拜見畢各官遞一應文冊暮夜風雨次日相見見畢官生各回不再見巡捕官

率兵快晝夜巡邏但有沿墻窺竇拋磚擲瓦及行走踪跡可疑者卽拿送究新到星相醫卜面生之人驅逐不容留住如違巡捕官責治地方歇家鄰佑連坐

一按臨次日祇謁先師官吏師生禮生止于櫺星門伺候一躬不必稟接及沿街導引拜畢升明倫堂官坐以次揖見如禮應坐官遵照憲綱序坐講書生員總出班一揖西向立講畢不必揖跪以次下堂東向立俟行賞罰畢官吏師生先出不必赴謝是日衙門投文畢放告巡捕官役搜檢明白放入事不關學校者不准與生員有隙故行撻扯者責究

一駐劄處所初到日照常送米麩一次以後發簿照數辦

送各該提調州縣不許另送下程如久住去處柴炭油燭及門皂柴米俱酌定數目五日一送筆墨紙劄候票取方送送進物件巡捕官細按如遇考校日期生儒供給俱先一日送進每名大餅六個水果四枚夏月加西瓜半個卽置每桌上教官仍給飯一餐俱要精潔堪用敢以惡濫冒破官錢該吏坐贓問罪各員役供給亦先日預貯各州縣同日考者先期扣筭合用銀若干會同總辦以免偏累事畢通前公費及一應修理衙門置辦器皿餘賞花紅紙筆之費一併造冊各具總撤數若干候起馬日呈報以憑查考

一童生試卷各照舊式置辦不許長短不齊卷面中間照

常三圈上圈填某府州縣中圈生員填廩增附青社字童生填童字武生填武字下圈填某經接縫處上用提調下用儒學各印鈐蓋提調官置印信方簿一樣二扇面開某府州縣生員號簿內開送考各生姓名下註廩增附青社等項字樣人各一行各名上留空白二寸許以備填號仍照千字文置籤一筒內形音相似如水水王玉字雨辰臣之類除去不用考前二日提調官信手抽籤填簿照號填卷背後圈內用教官印鈐蓋摺疊處彌封用提調官印鈐外用浮票楷書姓名粘卷面第三圈下旁留少許填坐號仍用提調官印鈐半在卷半在票號簿固封各提調處童生卷俱同其生員點進手冊照廩增附青社次序開造臨

期提調官于大門外每二十名爲一牌唱名序進二門外
揆檢散卷每卷二十爲一封上書某學第幾牌試卷印鈐
摠置卷箱散訖將空箱連鎖鑰送進童生各式俱與生員
同惟序進查照廩生結狀類造以便識認教官試卷提調
官備卷面明書職名願科舉者與生員一體編號

一試日合用員役印卷受卷散籤給牌官東西共二員以
精敏教官充之供給巡綽官各一員司儀門啓閉官一員
俱以州縣賢能佐貳或府衛首領充之能書吏四名管寫
題畢以二名司茶司茶者各管受卷司茶者各管封卷東
西各能幹官二員早司照進牌晚收照出牌以巡檢大使
充之廚役二名巡綽瞭望快手八名分爲二班外用巡捕

官二員以謹畏佐貳首領官充之報門吏二名試之日二
吏把門二官分東西帶領民壯二十名軍牢二十名揆檢
仍坐名挨次派定二十對不許那動揆檢官二員以衛所
官充之其寫題受卷封卷以受卷官督理司供司茶廚役
以供給官督理巡綽瞭望以巡綽官督理照進照出以司
儀門官督理俱先一日開具姓名手冊呈驗仍于隔別州
縣分派二班以備臨期抽用各員役日午給飯一食候飯
熟供給官稟明二門內擊鼓三聲督率內班皂隸用食盆
散給以上除職官原有職守各吏役人等須擇忠實勤敏
者送用如中間有受賄傳遞等情事發並生童一體重究
提調官亦不得辭責在內各官役每名仍各與事例一本

俾將本等執事演習慣熟無至臨時周章差錯

一試日漏下五鼓外巡兵壯舉放三銃以便諸生齊集執牌吏將生儒照次擺齊候開門提調官免掛巡捕官帶民壯軍牢四十名至儀門外站立兩傍次將內執事員役按檢點進生員各戴頂帽手執筆硯水注隨牌聽點該州縣提調官于大門外查照各生手冊唱名隨牌引至儀門外魚貫序立按檢官連唱仔細按檢兩班齊應二人對按一人按畢府提調官點名給卷仍令同列辨認互相覺察如有懷挾片紙隻字及金銀等物或冒籍頂名代考者本生照律例問罪枷號按獲員役重行獎賞執照進牌官引二十人至公座前聽點名隔別州縣軍壯覆按若搜出情弊

內搜檢員役破格獎賞外搜檢員役究賄重治印卷散籤教官在小公座前夾直放長桌東西相向照點名冊唱名本生高聲答應隨執試卷子東立教官桌上用督學印一顆西立教官信手掣籤給各生卽令吏填註卷面浮票上以防換籤東籤者東下西籤者西下各認號就坐督學不時抽查數號如已得籤往來行走故不進號及已就坐東西觀望者扶出黜退進畢內搜檢員役出提調官教官將原點名手冊繳入計入考總若干名有不到者大書不到二字于本名卷上一併送查點名後方到者抹卷扶出巡捕官稟領大門鎖鑰查大門內二門外並無一人方從外封鎖次司儀門官將儀門封鎖鎖畢堂上擊雲板一聲肅

靜官吏執題目牌于甬路上下行走俾其熟視短視者立稟教官將題高誦二三遍不許往就兵快輪班站立瞭望下班者退入儀門房內凡遇各項犯規認定行次面貌擊鑼一聲高稟某號第幾桌生員犯某事本生自持卷赴堂印記二人共犯二卷同印推捩者以抗拒論黜如犯規不舉及不犯而妄稟者各員役重究已時供給官稟明二門上擊鼓三聲方許飲茶出恭飲茶者趨飲茶桌自擊小雲板一聲東坐者放卷于桌之東西坐者放卷于桌之西司茶吏印飲茶二字飲畢領卷自擊雲板二聲復位出恭者趨出恭桌自擊木梆一聲亦各東西放卷執出恭牌由甬路中行司恭吏印出恭二字恭畢領卷自擊木梆二聲

復位二生不許並出偶有並出稍後者于甬路拱立待先者復位始行攙亂者及不交卷不擊梆領牌不由中行者候恭候茶時並立接談者俱印犯規二字飲茶出恭止許一次重出者不准卷面仍印犯規二字但有一人交卷卽撤去飲茶出恭桌是日各執事員役須肅靜不許輕出一聲以亂文思惟未時大門外重擊鼓四聲堂上擊雲板四聲呼快交卷申未大門外重擊鼓五聲不論已未膳完俱交卷不交卷者收卷扶出決不給燭其原給號籤同卷交還把大門官務要依時擊鼓不許亂擊以混聽聞交卷時司儀門官督率執事二員侍立二門以一員收照出牌以一員司啓閉受卷官東西各一員督率受卷封卷吏四名

分立桌傍照各府州縣座牌交收交卷時本生即將浮票扯下帶回受卷官每收一卷先檢閱卷面背如不扯浮帖或書寫姓名門第關節及卷內夾帶片紙者不許給牌即時稟究篇數不完者印不完二字卷上有犯規等項印記者不許給牌將卷仍付木生執立堂下候出盡查係移席換卷丟紙者徑黜退餘俱分別責治受卷官一面督各吏將所收卷每學以十卷爲一束三束爲一封註明某學三十卷某官某吏封送判收貯各卷箱生員從甬道中直趨儀門候三十牌足司儀門官稟請鎖鑰開二門收一牌方放一人如無牌者卽係夾帶試卷司儀門官拘留稟究如卷完而值牌盡執卷立等已收足三十牌巡綽官公同數

明繳上原桌高聲稟收牌訖擊鼓一聲大門外巡捕官亦擊鼓一聲從外開鎖門止半開逐一放出把大門官吏不許入限內儀門官吏不許出限外違者嚴究凡開大門放出如容閒人在外探聽并潛入大門內者各員役究贓重治生員出盡收卷官計筭收過籤數與散過籤數有無多寡收過卷數與送考人數有無異同查美明確稟請點名手冊填報于後考童生儒士俱同生員試畢次日免謝各回寓所靜聽發落如發落稍遲候牌示暫回臨期調取一發落先一日牌出提調官預將堪用絹紗絨花紙墨筆等項絹紗或平價折銀絨花仍用三等前數十名各備京文紙若干刀紙花二枝整辦造冊明開尺丈于各項下仍

將前次督學賞格附開冊後以憑查酌當日送進次日開門提調將印鈐寫就等第名數起止文案並閱過試卷領出拆號預將與考生童喚齊先拆不取童生卷次折六等生員卷查對明白卽將各卷唱名給看仍收類繳此二項如有字號差錯等弊許持卷進稟查無別弊諭令先散次拆生員一等至五等及取中童生卷各填卷填案明白亦將卷唱名給看發案之日凡生員應幫補者卽查明開揭同原編號簿送查教官隨領諸生聽候發落先將訪過行優行劣生員同衆審問衆情厭服方行賞罰行畢諸生聽候照序唱名各生循序至簷下一等二等各爲一班三等人多量分起數各將領過卷親自交還領賞罰畢用鼓樂

導引行優者居前次一等次二等者俱由中門出次三等次四五等俱由西角門出各照名次行攙越者責革若字號差錯卽時稟查發落不到者革頂帶限一月考奪取中童生卽隨生員進以次發落次日各該提調官仍率該學教官聽候考查外州縣官吏師生當日辭回不必候送一每日辰時投文申時領文把門吏領出印信號簿二扇一扇登記發行公文一扇遇各衙門遞到公文先檢無磨洗拆動夾帶私書等弊方許登記詳驗批文各幾角幾件巡捕官印驗訖二字付原役投入解審補考比銷各隨牌入鋪遞公文亦照前登記每日門吏各註姓名備查如員役刁難需索許稟拿問其考試閱卷之日一應公文俱巡

捕官驗送駐劄州縣登簿收貯每一日總爲一束候發落
完類開手冊送進有批迴者該衙門徑註收發批候發落
完日類送一切書札徑自阻回非有十分緊急公事不許
傳鼓經過士夫枉顧者守門吏跪稟收帖如違重究

取進童生名數

府學二十名 大縣十五名 中縣十二名 小縣七名

八旂生員額數

康熙九年二月禮部覆准督學蔣一疏入旂滿洲蒙古
考取生員四十名漢軍併額駙下子弟共考取生員四十
名其在外平西親王下者亦各于駐劄該省漢人額外平
西親王另取生員十名平南靖南王下生員各取七名定

南王女續順公下者各取三名

復八旂科目

康熙二十六年六月禮部題定

恩詔一欵八旂滿洲蒙古從來原有定例同漢人一體開科取
士前因用兵之際暫行停止今仍照舊舉行欵此查得康熙
八年定例除廢官并佐領下巴牙喇撥什庫兵丁拜唐阿
奴僕不准考試今將此等人亦不准考試外有閑散學習
漢文情願作漢文考試各都統將應試姓名開送臣部轉
劄順天府府丞遴選移送順天學院于順天生員額外滿
洲蒙古照舊例編滿字號考取生員四十名漢軍原取生
員四十名但佐領爲數無多應編合字號減二十名考取

生員二十名鄉試時將所取生員并部院衙門六品七品筆帖式不論上朝未上朝廕監生并捐納俊秀有情願鄉試者一併劄付順天府于直隸舉人額外亦編字號照舊例滿洲蒙古取中舉人十名漢軍應減五名取中舉人五名會試時亦于漢進士額外照考取生員舉人所編字號滿洲蒙古照舊例取中進士四名漢軍應減二名取中進士二名查滿洲蒙古漢軍中書及在唐拜阿之俊秀廕監生生員無品筆帖式烏林人由官學生補授外郎者從前未經議覆今無品筆帖式烏林人外郎有願考生員者准其考試中書及兵丁拜唐阿原係俊秀廕監生生員有願鄉試者亦准其鄉試與漢人一體作文考試其盛京八旗

滿洲蒙古漢軍考取生員俱與京師一體照舊例該將軍移送府丞將滿洲蒙古編滿字號漢軍編合字號照民童例作漢文考試滿洲蒙古取生員三名漢軍減去一名取生員二名鄉試會試編入在京滿洲蒙古漢軍數內一併考試奉

旨依議有職事人停其考試

增江浙進學額數

康熙二十八年六月禮部等題准浙江原額生員一千一百九十餘名江南原額生員一千六百八十餘名今酌量小學生員八名照中學取十二名中學生員十二名照大學取十五名大學生員十五名照府學取二十名府學生

員二十名應增五名共取二十五名此數已足廣勵人才
但小學既增四名中學止增三名應將中學再增一名定
為十六名

增奉天進學額數

康熙三十年七月禮部覆准奉天府尹張 疏稱滿洲蒙
古漢軍取進定額滿洲蒙古共得三名漢軍僅得一名額
數無多未免士氣稍阻今人文日盛非向年可比或額外
量增等因相應如該府尹所請滿洲蒙古增三名共取生
員六名漢軍增二名共取生員三名

復增奉天進學額數

禮部覆准奉天府丞金 疏稱盛京八旗滿洲蒙古漢軍
自開科以來讀書之人日盛而額數滿洲蒙古止取生員
六名漢軍止取二名似屬人多額少請照京師例量增等
語查盛京考取生員今添八旗包衣滿洲佐領子弟考試
應如該府丞所請將滿洲蒙古再添四名共取十名漢軍
再增二名共取五名

入場科舉額數

康熙三十年十二月禮部覆准浙撫張 請廣科舉之額
一疏查本年八月內臣部議覆江督傅 疏稱江南大
省讀書人多每舉人一名僅准六十名應增廣科舉之額
使其入試必致愈加砥礪等語應如該督所請每舉人一
名再量加四十名入場應試等因在案今浙省每舉人一

名取科舉六十名士子多而額數少未得盡遂觀光之志
應將該撫所請亦照江南省每舉人一名加四十名令其
入場應試

歲科併考

康熙二年正月禮部題定查自今以後各直省學臣三年
內止應考試童生一次鄉試後報滿凡前任學臣已經考
過一次者勿得再考如有前任學臣考試未完緣事離任
者許新學臣將前任未考州縣生童接考以應鄉試如有
違例重考者聽該督撫題叅

復科歲兩考

康熙十二年十月禮部覆准臺臣張 疏稱三年之內科

歲併爲一考如大州縣科歲昔取生員八十名今止取十
五名此三年之內有因考黜去者有因事故去者有因死
亡去者有因科貢去者所入不敷所出且三年爲時之久
僅行考試一次督責不勤士子學業易荒况生員優免廩
餼又已停給亦何所費于國家而必過爲減損其數請照
舊例或仍復科歲之制或酌增進取之額等因查學政全
書三年之內科歲兩考查順治十八年十一月科臣史
疏請併歲科爲一考今三年內童子入學府學止二十名
大學止十五名中學止十二名小學止七八名據直省學
臣所報文冊各學生員三年內每學援納事故黜革等項
約三四十名至一百餘名不等今臺臣張 疏稱三年爲

時之久僅行考試一次儲才不廣且督責不勤學業易荒
請照舊例或仍復科歲兩考之例等語

世祖皇帝時舊例三年內將生員童生仍行科歲兩考每歲額數
俱照見行定數考取至于滿洲蒙古漢軍併諸王等王以
下今既俱作漢文考試相應俱照漢人例一體考試

以歲考准科舉

康熙四十一年八月禮部覆准貴撫王 疏稱茲當鄉試
前係學道陳正歲試甫畢日疾乞休新任學道柴廷望于
本年五月初八日到任去鄉試之期僅三閱月請將前道
歲考一二等生員准作科舉等語應如所請將歲考一二
等生員准其科舉以應本年鄉試鄉試後童生仍行考取
其科考分別生員優劣幫補廩增該撫所稱生員未經科
考不必再補科考之處不便准行鄉試後生員仍照例補
行科考將試冊速行送部

一二等作科舉

康熙四十六年十二月禮部覆准湖督郭 一疏查四十
一年貴撫王 以鄉試之期僅閱三月勢不能遍行科考
請將前道歲試一二等生員准作科舉以應本年鄉試事
竣補行科考取進童生其生員未經科考者不必再補等
語臣部議覆將歲考一二等生員准其科舉鄉試後仍照
例補行科考具題准行在案今該督既稱湖北歲試湖南
並未歲試四十七年鄉試之期誠恐有悞賓興大典應行

文該督俟新學臣到任將未經歲試之湖南作速考完一
二等生員准其科舉以應鄉試試畢仍將湖南湖北未經
科考之生童照例補行科考將試冊速行送部

磨勘試卷

康熙十二年六月禮部題准查學政全書學臣到任將日
期報部以到任爲始每三個月解卷一次臣部會同禮科
磨勘試卷解部必用原本真卷不許改謄潤色不許遲延
違者查叅又康熙八年九月臣部通行各學臣三個月解
卷一次因科歲併爲一考定限六個月解卷一次務將原
卷照依大小學定例卷數解部等語又查學政全書歲科
兩考俱週臣部考核稱職學臣咨吏部照常陞轉外任其

公明尤著者照舊例題陞京堂徇私溺職者叅處今若停
止磨勘考核不惟學臣無憑陞轉且學臣愈無顧忌作弊
亦未可知相應仍照現行例行如勢宦請託併學臣徇私
溺職改謄試卷行賄等弊該督撫科道官據實糾叅交與
該部從重議處

科歲解冊送部

康熙二十五年七月禮部題准各直省學臣造冊解送原
以稽查任內行過事宜進學數目但各學臣所轄地方俱
親臨考較整勅學校職事甚繁一年內兩次解冊未免煩
擾自今請定爲例歲考已畢將簡明文冊送部查對一次
解冊到日立行驗收當堂發給批廻科考畢亦如之總計

各學臣三年任內只除解冊二次其違限不解者仍照定例參處則學政不無小補

取府卷解冊

康熙三十九年十二月禮部等衙門覆准湖督郭 總河 張 科場各條

一嗣後府取童生不必限數府取荒謬不通故意朦混學臣申報核參其縣府道試卷一併解送學臣三連對驗筆跡

一嗣後學臣歲考後止令解全冊一次其科考後止將錄取生童等第姓名幫補月日及各項事故分別開報不必另造四柱全冊

貢舉通例

大清會典凡歲貢府學每年貢一名州學三年貢二名縣學二年貢一名提學每歲將次年應貢生員一正二陪嚴加考選俱以屢經科舉者方准仍以食糧年深爲序

凡恩貢遇 恩詔直省府州縣學俱以本年正貢改爲恩貢次貢作正貢此外有才學出衆孝悌著聞者聽學臣不拘廩增附特薦試用

凡選拔貢令在外府州縣學廩生赴提學道考試選貢來京以學達經濟行合規矩者方爲及格

凡副榜貢直省鄉試副榜各送監肄業內廩生副榜照恩拔貢生例坐監六月增附生副榜照歲貢例坐監八月未

為定例

凡貢監直省府州縣不拘廩增附每學將文行兼優者大學起送二名小學起送一名入監肄業名為貢監

凡功貢隨征廩生俱准貢監生員有軍功二等准作監生更有軍功二等准作貢監

凡准貢監生生員捐助城工一千兩以上者准作貢監坐監三月歷事一個月五百兩以上者准入監坐監六個月歷事三個月聽吏部考用

順治二年以三月十五日廷試貢生三年題准直省歲貢生于每四月十五日廷試

挨取歲貢

康熙八年八月禮部覆准臺臣徐 疏稱

世祖皇帝時定例各府州縣三年內論生員食廩次序取送一人是為歲貢其三年歲貢應否酌量舉行祈

勅部確議以鼓士氣等語查考取歲貢原從廩生中年久學優者挨年考取以鼓勵士子今仍應將取歲貢之例照

世祖皇帝時定例遵行

停止捐納歲貢

康熙二十六年五月戶部等覆准科臣王 疏稱教職一途皆由歲貢選授捐納歲貢之人行誼未必歷練詩書未必通曉而儼據師席求其師嚴道尊興行教化豈可得耶捐貢之人日多則正貢益滯等語應將已前納過歲貢仍

以致職員缺錄用外嗣後將捐納歲貢之例停止

歲貢免廷試

康熙二十六年三月禮部等題准查歲貢廷試實屬無益嗣後各直省歲貢并捐納歲貢免其來京考試該學臣照陸續考准歲貢原卷一總造冊呈送禮部轉咨吏部補授訓導至生員內有情願入監讀書者該學臣給文起送到部劄監肄業舉人就教者亦免其廷試具呈吏部照科分

名次補用

歲貢州縣給文赴監

康熙三十六年五月禮部題准各省歲貢有情願入監者停其各學臣起送從本州縣給文准與人文到監肄業

考選拔貢入監

康熙二十四年二月禮部覆准臺臣劉疏稱生員歲貢特行選拔一次照壬子事例府州縣學考取生員文藝精醇品行端方者准為拔貢入監讀書等語查順治八年八月內臣部題覆都察院條議疏內各學生員選其文行兼優者考選赴監又康熙十年八月內題覆國子監祭酒賈祿等一疏內稱監生中止有輸納一途貧窶之士無由觀光將生員遴選起送等因遵行在案今應照康熙十年事例府學起送二名其餘各學起送一名赴監如該學無文行兼全者寧聽缺額不得濶取其考過試卷俱解送臣部嚴加磨勘有冒濫不堪者將考官一體糾叅

正貢作恩貢

康熙三十七年二月禮部咨准廣西巡撫王 咨稱

恩詔內開一各省正貢作恩貢次貢作歲貢欽遵在案但查粵西歲貢定例以康熙十八年恢復為始府學一年一貢州學三年兩貢縣學兩年一貢今三十七年州學乃為空貢之年有無一例均沾

皇恩其恩貢一途未考者應不照歲貢之例仍舊考試至已經考定之歲貢今作恩貢或將原考歲貢之卷俱由本道衙門連冊一併解部抑不用考試解卷止造花名清冊又或取其貢結填給貢單由藩司衙門給文起送赴部各項事宜未諳無憑舉行咨請示覆等因查順治十八年康熙十

四年 恩詔內以正貢作恩貢次貢作歲貢者俱將本年遇 詔之正貢改作歲貢次貢換考充歲貢其已經起送本年歲貢到部者本部註改未經起送者該學道即行註改再本年有歲貢方有恩貢若本年無歲貢則亦無恩貢歇貢之年不准起送等因在案今康熙三十六年 恩詔以正貢作恩貢次貢作歲貢應以本年遇 詔之正貢改作恩貢次貢換考充送本年分之歲貢至于歇貢之年仍不准起送又查順天江南浙江湖廣山東山西江西河南陝西廣西奉天等十一處三十六年分歲貢已據該學院道并府丞起送到部隨經轉送吏部其雲南四川貴州廣東福建等五處三十六年分歲貢未經起送到部相應通

行各學院道將已經起送本年分歲貢到部者本部移咨吏部註改作恩貢該學院道并府丞換給恩貢貢單其未經起送本年分歲貢到部者該學道卽行改作恩貢造冊送部其歲貢俱遵照 恩詔將次貢照歲貢例挨考一名送充本年分歲貢可也通行

陪貢准拔貢

康熙三十九年十二月禮部等覆准川督席 題撫臣奇貪一疏拔貢從無一名秉公嗣後遇拔貢之年將歲貢之次各陪貢准作拔貢

禮生

大清會典順治十一年題准生員充禮生者辦事三年除州

縣佐貳等官十七年覆准各項貢監充禮生者照考定職銜加等優授如考至州同者加以知縣准貢例監出身考至州同者不加等考取別項仍准加等

頂補贊禮生

康熙二十五年七月禮部覆准江南學臣李 一疏嗣後凡學宮贊禮生不許濫用應照國子監例選擇在學肄業生員文行兼優儀表端莊聲音宏亮者充補大學不得過六名中小學不得過四名考試時准爲優等仍行報部見在冒濫衣頂者盡行黜革其古聖賢嫡裔向有奉祀生仍留衣頂奉祀將名數報部至社學多費敗類實繁應將冒濫名色者一併嚴行查革又贊禮生同生員一體入場考

取三等者准爲二等考取二等者准爲一等附于一二等
生員之末准補廩增科舉出貢五年滿日另行選擇充補
丁憂病故卽行出缺另補

禁止生員贊禮

康熙三十三年閏五月禮部覆准江南學政許 疏稱凡
地方大小各官到任落學祭壇講約以至朔望行香皆以
生員爲鳴贊情面既熟奔競遂滋或私相夤緣或公行請
託借交結于官長因恐嚇乎鄉愚請

勅部定議裁額限期惟

萬壽令節元旦冬至以及春秋二丁仍責生員贊襄大典其餘
地方各官自有陰陽生禮房執事不必衣頂皆可鳴贊一

槩不用生員等語查康熙二十五年七月臣部覆准江南
學院李振裕一疏凡學宮贊禮生應照國子監例選擇在
學生員文行兼優儀表端莊聲音宏亮者充補大學不得
過六名中小學不得過四名考試時准爲優等等因在案
今該學院既稱凡地方大小各官到任落學祭壇講約以
至朔望行香皆以生員爲鳴贊情面既熟奔競遂滋或私
相夤緣或公行請託請裁額限期等語應如該院所請大
小中學均不得過四名遇

萬壽令節元旦冬至春秋二丁仍用生員其餘地方大小各官
到任等事一槩不用生員其贊禮生員既已裁額限期考
試時如仍准爲優等恐文理荒疎之人愈致求謀亦未可

定應于考試時一體論文其准為優等之處停止

禮生停止加等

康熙二十九年四月禮部覆准吏科陳 條奏查康熙二十四年國子監祭酒翁 疏稱選取監生十名充為禮生俟三十六個月期滿咨送吏部照例加等錄用遵行在案今科臣陳 既稱禮生不過朔望贊禮一歲之中効力無几無勤勞之處嗣後引禮貢監例監考定職銜者俱照考定職銜選授停其加等錄用

冒籍生監改原籍

康熙十六年十一月禮部覆准西城御史范 疏稱未中監生有以南冒北者亦當嚴查歸籍等語查未中監生員如有冒籍者令其本身赴臣部具呈舉首免革監生員改正原籍在外者亦令赴學院學道具呈舉首免革監生員改正原籍仍報臣部

同省異府借籍考試

康熙四十三年三月禮部覆准貴學張 條奏查四十年十月九卿會覆雲撫石 題脩陳滇士一疏滇南天未着籍之人遵照嚴禁使邊彘無所觀感應如所題仍許全省異府之人往試其遷居之處聽其自便奉旨依議欽遵在案今貴州亦照滇省之例許同省隔府之人往試俟人文充盛之日仍行嚴禁

捐納監生當年應試

康熙二十九年八月禮部咨覆江撫洪 咨稱各屬捐納米穀生俊樂于就近肄業苦于赴監且時屬賓興不得卽與觀場之例捐納之輩率皆裹足合咨禮部照納銀之例准其本年鄉試等因查康熙十四年議准本年援納監生卽准其本年科舉十七年議覆捐銀捐糧米草豆監生槩令入闈等因在案應將今歲捐納米穀監生照例亦准其鄉試可也通行

捐納監生隨便應試

康熙三十二年七月禮部咨覆福撫卞 咨稱積貯天下本計案內捐納監生因場期已過前科未有入闈今兩年有餘多未赴監肄業應否准其就近鄉試等語查康熙二

十九年七月內原任江撫洪 咨稱各屬捐納米穀生俊時屆賓興不得卽與觀場之例捐納之輩率皆裹足等因臣部具題應將今歲捐納米穀監生亦照康熙十四年例准其鄉試在案各項捐納監生成皆聽其自便或赴監讀書或在籍肄業均令一體觀場但止令各省常平倉監生到監期滿方准回本省鄉試則無力赴監者遇賓興之年不得均與觀場應請嗣後各省常平倉捐監生亦與各項監生一體遇鄉試之年或在順天或在本省聽其自便俱准其鄉試可也通行

到監假回仍鄉試

康熙三十一年正月國子監通行嗣後凡監生考到肄業

遇有省親完姻養病或請假歸里本監照例准給假票一
張當堂親領聽其本省鄉試定例後仍有將典簿廳移會
投送本籍州縣者卽係假冒嚴行究治

京闈鄉試到監錄科

康熙三十九年十二月禮部等會議題定監生免其驅逐
回籍劄國子監通行各府州縣凡屬恩拔歲副并各項貢
監諸生不論已未考職願就京闈鄉試者俱着自寫親供
兼取里隣結狀開載祖父仕否存故確註籍貫年貌經書
同監單部照送本地方官詳查加具印結申達本監諸生
親自齋投以文到之日照各省定限起身于四十年八月
以前到監必在監應過季考二次月課六次者方許錄科

如赴監違限考未及數者一槩不准其願在本省鄉試者
學使考錄

雲貴遠省取京官結應試

康熙三十五年十一月禮部覆准御史張 條奏內稱嗣
後監生在順天應試着取原籍地方官印結方准入場如
有假冒該地方官一併治罪查舉人就教之例近省三科
不中方准就教遠省一科不中卽准就教應比照此例其
近省士子令其取本地州縣衛官印結其遠省雲南貴州
四川廣東廣西福建湖南甘肅此八處之在京應試者仍
取正印京官印結取同鄉官保結親身赴部投遞如有假
冒將出結官員照例一併議處

丁憂捐監生

康熙三十年九月戶部咨韓城縣附生衛仲舒丁繼母憂服中援納應否准監請示查常平倉事例九卿會議疏內並未議及丁憂不准捐納

士官子弟應試

康熙二十二年十一月禮部覆准侍郎庫疏稱黔省土官族屬子弟并土人應試照土人之多寡定數附于貴陽府共定取土生二十五名土人無用流官之例將土生不准科舉補廩出貢其不願應試者不致勒令應試若取經書不諳文義不通者將考試官叅處等因應如所題其土生應三年一次共考取二十五名另行開造附于各府學

之後照例解送臣部禮科查核

禁止考試私派供給

康熙二十一年八月禮部覆准學院董條奏如直省州縣官有私派供給名色照舊累民者該督撫據實指叅交與該部從重議處通行直省永禁

學道不許帶長接

康熙二十一年九月禮部題定凡學臣所考地方量撥別縣書吏供事不許私帶掌案長接名色除正卷外不許多印一卷遇考校日一槩封筒不許傳入如有此等情弊該督撫據實指名題叅

接考完日報滿

康熙十七年十一月禮部覆准湖撫張 疏稱提學道蔣
未修于十七年三月內到任計鄉試之期僅數月科考難
于遍及題明卽以前道歲試之案准作科舉援江西邵吳
遠三年兩考事畢報滿之例查康熙二年部覆江督張
疏內學道接考小半及一半者所屬未考尚多不便令其
報滿再查定例提學道必歲科兩考俱于鄉試年十二月
報滿考小半及一半者相應通行考試以完下三年一考
之數行文吏部知照督撫遵行

學道報滿限期

康熙二十六年四月禮部題定嗣後鄉試第二年學臣接
任者春夏受事則令作速考完如期報滿秋冬受事亦令
如期報滿如果未能考完將未考地方多者許展限五個
月少者三個月報滿如于鄉試年接任者料理科場事務
應照例令其下次三年考試完日報滿

康熙五十三年題定學院送場後
開列速行赴任一條載吏部定例

解送學冊遲延

康熙三十五年九月禮部咨科考學冊火遠解部磨勘毋
得聽其託故延挨致生弊端如已經解送在途遲延卽將
起程日期立查報部以便照僉差不慎之例題叅

學道報滿一月具題

康熙二十四年五月禮部咨各省學道報滿後該督撫于
一月內考核具題如逾一月者將督撫照違限例處分

南籠廳立學

康熙五十四年十月禮部覆准貴撫劉 疏稱安順府南籠廳請炤湖廣辰州府鎮溪所之例設立學校題請前來應如該撫所請自五十五年為始炤小學例取進文生武生各八名學官不必添設以普安縣訓導專司膳夫門子等役分半跟隨官役俸工等項俱不必增添其學記俟設學後另行題請學宮該廳捐資俸銀修葺其出貢補廩應俟人文繁盛之日該撫題請到日再議至文廟春秋祀祭等項於該廳地丁銀內動支備辦每年造報奏銷

直隸入學照江浙

康熙五十四年十二月禮部覆准直督趙 疏稱直隸府

學及州縣衛之大小小學進取歲科兩試童生自五十五年為始俱炤江浙兩省之額等因前來查順天府學取進二十五名大宛二縣學各取進二十名與江浙同無容加增其餘府學定額各二十名今各加增三名共各取進二十三名州縣衛大學定額各十五名今各加增三名共各取進十八名中學定額各十二名今各加增三名共各取進十五名小學定額八名今各加增二名共各取進十名自康熙五十五年為始載入學政全書永遠遵行

文體第七

御製訓飭士子文

康熙四十一年正月奉

上諭國家建立學校原以興行教化作育人才典至渥也朕臨御以來隆重師儒加意庠序近復慎簡學使釐剔弊端務期風教修明賢才蔚起庶幾樸棧作人之意乃比年士習未端儒效罕著雖因內外臣工奉行未能盡善亦由爾諸生積錮已久粹難改易之故也茲特親製訓言再加警飭爾諸生其敬聽之從來學者先立品行次及文學學術事功源委有序爾諸生幼聞庭訓長列宮墻朝夕誦讀寧無講究必也躬修實踐砥礪廉隅敦孝順以事親秉忠貞以立志窮經考業勿

雜荒誕之談取友親師悉化憍盈之氣文章歸于醇雅毋事浮華軌度式於規繩最防蕩軼子衿佻達自昔所譏苟行止有虧雖讀書何益若夫宅心不淑行已多愆或蜚語流言脅制官長或隱糧包訟出入公門或唆撥姦猾欺孤凌弱或招呼朋類結社邀盟乃如之人名教不容鄉黨勿齒縱倖脫褫樸濫竊章縫返之于中寧無愧乎况乎鄉會科名乃掄才大典關係尤鉅士子果有真才實學何患困不逢年顧乃標榜虛名暗通聲氣夤緣詭遇罔顧身家又或改竄鄉貫希圖進取囂凌騰沸網利營私種種弊端深可痛恨且夫士子出身之始尤貴以正若茲厥初拜獻便已作姦犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕用嘉惠爾等故不禁反復惓惓茲訓言頒到爾等務共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮卽爾祖父亦增光寵矣逢時得志寧俟他求哉若仍視爲具文玩愒勿傲毀方躍冶暴棄自甘則是爾等冥頑無知終不能率教也旣負栽培復干咎戾王章具在朕亦不能爲爾等寬矣自茲以逞內而國學外而直省鄉校凡學臣師長皆有司鐸之責者並宜傳集諸生多方董勸以副朕懷否則職業勿修咎亦難逭勿謂朕言之不預也爾多士尚敬聽之哉

御製書在聽刊刻

康熙四十五年五月禮部轉傳大學士馬 等奉

元音貝
上諭朕製古文淵鑑資治綱目等書俱已早完刷印給賞大臣
此等書籍俱係朕製甚好書籍特爲士子學習有益而製外
邊人不能得此書籍作速刊刻頒行一應書坊有情願刊刻
刷印者令其刊刻刷印以爲御製之書畏懼不敢刊刻轉傳
知京內大學士轉行禮部曉諭京城衆人並各省概行欽遵

纂修明史諭

康熙四十年 月奉

上諭朕四十餘年孜孜求治凡一事不安卽歸罪于己未嘗一
時不自責也清夜自問移風易俗未能也躬行實踐未能也
知人安民未能也家給人足未能也柔遠能邇未能也治至
上理未能也言行相顧未能也自覺愧汗何暇論史之是非

乎况有明以來二百餘年流風善政豈能枚舉其中史官舞
文杜撰顛倒是非者概難憑信元人修宋史明人修元史至
今人心不服議論多岐者非前鑑耶朕實無學每讀朱子之
書見古人明學以爲己今也不然爲人而已之句罔不心悅
誠服又讀孟子盡信書則不如無書益見史官上古不免訛
傳况今人乎班馬異同左國浮華古人以爲定論孔子至聖
作春秋有知我罪我之歎後世萬倍莫及者輕浮淺漏要自
筆削以爲自是不過好其史筆之名也朕論時人之際凡天
下讀書者皆能分辨古人之是非問時事人品不能一字相
答非曰從不與人往來卽曰不能深知日前之事作官之道
茫然不知而千百年前無不洞悉何得昧于當世而明于論

古豈非遠者明而近者暗乎所以責人重者責已輕君子不取也明史不可不成公論不可不採是非不可不明人心不可不服關係甚鉅條目甚繁朕日理萬幾精神有限不能逐一細覽卽敢輕定是非後有公論者必歸罪于朕躬朕不畏當時而畏後人不重文章而重良心者此也卿等皆老學素望名重一時明史之是非自有燭見卿等衆議爲是卽是也刊而行偶有斟酌公同再議朕無一字可定亦無識見所以苦辭以示不能也

春秋出單題遵胡傳

禮部覆准兵科柯 條奏查明洪武年間春秋題旨以四傳爲主至末樂以後則專主胡傳于是單題以外有合題

有比題有傳題至用傳語爲題意則主傳而題則仍經割裂扭合無異乎移甲換乙藏闔射覆經之若滅且絕者久矣伏乞

勅下禮部詳確定議專出單題兼用四傳將傳合比題盡行刪去如論一事必知一事之始終論一人必悉一人之本末今後鄉會試併各省學臣考試生童俱應出單題至於兼用四傳查各傳意義不同取士難于畫一仍應照舊用胡傳可也

改復八股考試

康熙七年七月禮部題定查歷年考試之例做八股文章嗣後考試照康熙元年以前仍做八股文章考試

論題出性理西銘等書

康熙三十九年十二月禮部等題准會覆直撫李 疏稱
學臣于考校之日有能將經書小學講誦精熟者文理粗
成便與錄取如更能成誦三經以至五經者仍與補廩又
科場論題當兼命性理綱目今孝經題目至少以致重複
雷同等語應如李光地所議行令學臣有將經書小學真
能精熟及真能成誦三經五經者該學臣酌量優錄其孝
經論題原少嗣後考試將性理中太極圖說通書西銘正
蒙等書一併命題

考童生出四書小學

康熙三十六年四月吏部覆准臺臣荆 條奏查小學一

書令幼童講習于身心行誼頗有裨益考試童子令出四
書小學題各一道進學後則仍不用嗣後自三十七年為
始考試童子時出四書一道令做八股小學一道作論一
篇

考試仍做八股二篇

康熙四十五年二月吏部覆准江南學臣張 一疏嗣後
儒童正考時仍做八股二篇覆試則四書文一篇小學論
一篇通行各省學院道遵行

禁私刻濫選假鄉會墨

康熙九年正月禮部覆准順天學政蔣 疏稱鄉會墨卷
每一科出預先召集多人造成浮泛不堪文字假稱新科

墨卷房書相沿成習文體日壞使每年鄉會試卷禮部選其文字中程者刊刻成書頒行天下一應坊間私刻嚴行禁止等因查學政全書一欸各直省生員不許濫刻選文憲稿如有犯者聽臣部禮科糾叅重處等因今該學院蔣所請已經禁止在案毋庸再議奉

旨禁止濫刻選文憲稿雖有定例作何嚴禁著再議具奏欽此議得文字舊例必以中式真文准其謄寫選刻發賣如將鄉會墨卷預先召集多人妄行假稱新科墨卷傳賣及直隸各省生員濫刻選文憲稿傳賣者臣部及科道外而督撫訪查將假造之人如係見任官員罰俸三個月未選官員於選官日罰俸三個月舉人罰停會試一年貢生罰停

廷試一年監生罰多坐監六個月生員降爲青衣儒童行令該地方官責二十板如有冒名私刻坐罪假冒之人令該地方官責四十板通行曉諭

禁私刻淫邪諸書

康熙二年四月禮部覆准禮科黃 條議學政全書內書賈止許刊行理學政治有裨文業諸書其餘瑣語淫辭通行嚴禁違者重究久經申飭今科臣條議以後如有私刻有乖風化者內而科道外而督撫訪實何書係何人編造指名題叅交與該部議罪

禁止左道私刻淫詞

康熙二十六年三月禮部覆准科臣劉 疏稱書肆淫詞

小說刊刻出賣一百五十餘種又假僧道爲名或刻語錄方書或稱祖師降乩爭相附和請通行毀板嚴禁等語應將此等邪教惑民諸書嚴行禁止如有不肖之徒違禁不遵內而科道外而督撫據實題叅該部依律治罪至私行撰著淫詞等書鄙俗淺陋易壞人心應通行中外將私行撰著刊刻發賣者一體詳察禁止毀其刻板如違禁不遵內而科道五城御史嚴查題叅外而督撫令府州縣官嚴行稽查題叅該部從重治罪凡此除該管官員外若令傍人訐告恐致奸徒擾害良民相應不准訐告

禁淫詞小說

康熙五十三年四月奉

上諭禮部朕惟治天下以人心風俗爲本而欲正人心厚風俗必自崇尚經學而嚴絕非聖之書此歷代所同也近見坊肆間多賣小說淫詞鄙褻荒唐瀆亂倫理不但惑誘愚民卽縉紳子弟未免游目而蠱心傷風敗俗所繫非細應卽通行嚴禁在京在外所在書坊仍賣前項淫詞小說者作何治罪著九卿詹事科道會議具奏

小說小抄治罪
例載刑部現行

文章限字六百五十

康熙二十年十二月禮部覆准科臣姚 條奏查條例內開前場文章字逾五百五十及冗長者不謄等語今若照定例恐詞意不盡若不限字又恐相沿冗長嗣後前場文章限六百五十字如違限例謄錄取中照例議處

禮部題本
墨卷頒發各省學宮

康熙三十三年閏五月禮部覆准江南學政許 疏稱各省鄉墨禮部悉照原本刊刻頒行會試額少文字不多亦應將四書經藝照本悉刊至房書仍做康熙九年部頒之例新進士各膳憲稿呈之房考定之總裁彙之禮部選訂發刻其有專稿佳文房書不能盡載者亦令諸臣鑒定自梓各省試牘學臣頒刻其餘房行諸選概行禁止等因查康熙三十二年十月九卿會覆工科彭鵬為闡墨悖旨改易等事一疏將直隸各省中式舉人四書文三篇照墨卷刊刻進呈御覽頒發各省學宮等因具題奉有

俞旨遵行在案應如該學臣所請將會試墨卷亦照各省鄉墨例刊刻四書文三篇進呈

御覽頒發各省學宮所用版片紙張工價等項于該部支取至於各省考取生員文章仍聽學臣頒刻外其房書憲稿係士子遴選平日所作佳文刊賣應將學臣所請新進士各膳憲稿書呈之房考定之總裁彙之禮部選定發刊之處毋庸議

題奏本式

大清會典順治二年定凡內外官民題奏本章不得過三百字雖刑名錢穀等本難拘字數亦不許重複冗長仍將本中大意撮為貼黃以便覽閱其貼黃不許過一百字如有

字數溢額及多開條款或貼黃原本叅差異同者該衙門不得封進仍以違式糾叅

題本式 每幅六行一行二十字格內擡頭二字平行十入字出格擡頭加一字頭行衙門官員姓名疎密各作一行寫不限字數年月下同若有連名挨次俱照六行書寫
某衙門某官臣某等謹

題為某事備事由云緣係云事理未敢擅便謹題請旨如不用請旨謹具題

知 題本面上寫一題字凡公事用題本比奏本畧小而字稍大

奏本式 每幅六行一行二十四字格內擡頭二字平行寫二十二字出格擡頭加一字衙門官銜或生儒吏典軍民灶匠籍貫姓名疎密俱作一行書寫不限字數右謹奏聞四字右字平行謹字奏字各隔二字聞字過幅擡頭計紙在右謹奏前一行與謹字平字畫稍小年月同前若連名者挨次俱六行書寫

某衙門某官臣某謹
奏為某事備事由云為此具本專差原役齋捧謹具奏

聞 自為字起至齋字止計幾百幾十幾字紙幾張

某年某月某日某衙門某官臣某 奏本面上寫一奏字若奏私事不用印

貼黃式 題本後貼黃用單紙一幅式與本齊行字連出

格二十一字前列官銜後列謹題請

旨同本式中間照所題情由簡明撮要不得冗長但行數不拘
定限期于幅滿而止奏本貼黃與題本貼黃式同但奏本
貼黃每行連出格二十五字後稱謹具奏

聞

明朝不稱故廢

康熙二十二年八月奉

上諭本內將明朝稱故明王稱廢王以後故廢字樣俱不必寫
停止設法二字

康熙二十八年三月戶部覆准吏科楊 條奏顏料量給

水脚一疏查從前軍興之際遇有急需間令該督撫設法

今海宇昇平

皇恩普被嗣後設法二字未行停止如州縣官員有借端仍行
設法私派之處該督撫卽行指名題參

軍法二字

康熙四十二年二月戶部題覆川督華 請捐納一疏奉

上諭這捐納本內有軍法二字是旨意則可言臣下不可言此
二字著改爲從重二字

更名復姓

大清會典康熙三年題准凡更復姓名漢軍漢人見任官員
在內中行評博在外知縣以上及候選進士皆令具題其
餘見任及候選官員止呈堂註冊旗下取都統印結漢人

在京取同鄉官印結在外具呈地方官咨部准其更復旂
下移咨戶兵二部及該都統漢人止咨戶部又題准督撫
有更名復姓者許互相代題

九龍等名卽令更改

康熙二十二年六月吏部咨准兵部題補授西安拖沙哈
番品級官員將盧九龍擬正具題奉

旨如此等名九龍幾龍者不合著發回令其更改欽此嗣後有
此等之名者卽令更改

監生吏員復姓改名

康熙二十七年八月吏部咨查定例內凡官員復姓改名
在京具呈到部取同鄉京官印結在外具呈該地方官送
部准與復改等語但查監生吏員名數甚多其中恐有假
冒頂替情弊亦未可定嗣後監生吏員改名復姓必經該
省布政司及直隸府尹守道轉送到部方准復改若州縣
官違例越申到部者概不准行

風化 第八

講明鄉約原例

禮部覆准御史陳

條奏古來設立鄉約申明六諭原以

開導愚氓事經

部具題屢行申飭恐有司視為故事相

應嚴行各直省地方牧民之官與父老子弟實行講究其

六諭原文本自明白易曉仍據舊本講解其鄉約正副不

應以土豪僕隸奸胥蠹役充數應會合鄉人公舉六十以

上經告衣頂行履無過德望素著生員統攝若無生員卽

以素有德望六七十歲以上平民統攝每遇朔望宣諭

旌別善惡實行登記簿冊使之共相鼓舞

敬重天地

孝順父母

和睦鄉里

莫作非爲

謹防盜賊

小心火燭

上諭十六條

康熙九年十月禮部題准奉

上諭禮部朕惟至治之世不專以法令爲事而以教化爲先其時人心醇良風俗樸厚刑措不用比屋可封長治久安茂登上理蓋法令禁于一時而教化維于可久若徒恃法令而教化不先是舍本而務末也近見風俗日敝人心不古囂凌成習僭濫多端狙詐之術日工獄訟之興靡已或豪富凌轢孤寒或劣紳武斷鄉曲或惡衿出入衙署或蠹棍詐害良善雀苻之劫掠時聞讐忿之殺傷一見陷罹法網刑所必加誅之則無知可憫宥之則憲典難寬念茲刑辟之日繁良由化導

之未善朕今欲法古帝王尚德緩刑化民成俗舉凡敦孝弟以重人倫篤宗族以昭雍睦和鄉黨以息爭訟重農桑以足衣食尚節儉以惜財用隆學校以端士習黜異端以崇正學講法律以儆愚頑明禮讓以厚風俗務本業以定民志訓子弟以禁非爲息誣告以全良善誠窩逃以免株連完錢糧以省催科聯保甲以弭盜賊解讐忿以重身命等項作何訓迪勸導及作何責成內外文武該管各官督率舉行爾部詳察典制定議具奏特諭欽此議得

皇上欲圖至治以教化爲先特頒

上諭應通行諭八旗包衣佐領並直隸各省督撫轉行府州縣鄉村人等切實遵行務使軍民咸知

皇上尚德緩刑之至意教化行而風俗自美矣

武職一體講讀上諭

康熙二十五年五月禮部題定查康熙九年已將上諭十六條通行八旂及各直省奉行講讀今各直省督撫應將十六條抄錄轉行該省提鎮等照通行文職庶民講讀例曉諭各該營伍將弁兵丁遇有閒時一體講讀并書籍俱應覽觀于忠孝大義講究明晰方爲克稱職任

鄉飲酒禮

大清會典凡鄉飲酒儀注京省及直省府州縣每歲正月十五日十月初一日于儒學行鄉飲酒禮前一日執事者于儒學之講堂依圖陳設坐次司正率執事習禮至日黎明

執事者宰牲具饌主席及僚屬司正先詣學遣人速賓俛以下比至執事者先報曰賓至主席率僚屬出迎于庠門之外以入主居東賓居西三讓三揖而後升堂東西相向立贊兩拜賓坐執事又報曰俛至主席又率僚屬出迎揖讓升堂拜坐如前儀賓俛介至既就位執事者唱司正揚觶執事者引司正由西階升詣堂中北向立執事者唱賓俛以下皆立唱揖司正揖賓俛以下皆揖執事者以觶酌酒授司正司正舉酒曰恭惟

朝廷率由舊章敦崇禮教舉行鄉飲非爲飲食凡我長幼各相勸勉爲臣盡忠爲子盡孝長幼有序兄友弟恭內睦宗族外和鄉里無或廢墜以忝所生讀畢執事者唱司正飲酒

畢以解授執事執事者唱揖司正揖賓僎以下皆揖司正復位賓僎以下皆坐唱讀律令執事者舉律令案于堂之中引禮引讀律令者詣案前北向立唱賓僎以下皆立行揖禮如前讀畢復位執事者唱供饌案執事者舉饌案至賓前次饌次介次主三賓以下各以次舉訖執事者唱獻賓主起席北面立執事者斟酒以授主主受爵詣賓前置於席稍退贊兩拜賓答拜訖執事者又斟酒以授主主受爵詣僎前置於席交拜如前儀畢主退復位執事者唱賓酬酒賓起僎從執事者斟酒授賓賓受爵詣主前置於席稍退贊兩拜賓僎主交拜訖各就位坐執事者分左右立介三賓衆賓以下以次斟酒於席訖執事者唱飲酒或三行或五行供湯又唱斟酒飲酒供饌三品畢執事者唱徹饌候徹饌案訖唱賓僎以下皆行禮僎主僚屬居東賓介三賓衆賓居西贊兩拜訖唱送賓以次下堂分東西行仍三揖出庠而退

凡鄉飲酒禮序長幼論賢良別奸頑其坐席間高年有德者居上高年淳篤者並之以次序齒而列其有違條犯法者不許干於良善之席違者罪以違制敢有喧譁失禮者揚解以禮責之 主府知府州知州縣知縣如無正官佐貳官代位於東南大賓以致仕官爲之位於西北僎賓擇鄉里年高有德之人位於東北介賓以次長位於西南三賓以賓之次者爲之位於賓主介僎之後除賓僎外衆賓

會典孀婦百歲給銀三十兩建坊旌表爲貞壽之門今熊氏壽至百歲令地方官給銀三十兩自行建坊

軍民百歲旌表

康熙四十三年三月吏部覆准陝撫鄂疏稱盩厔縣民劉守智等年一百四歲應請旌表等因查康熙四十二年三月十八日

恩詔內開軍民至百歲者題明給與建坊銀兩又查會典內稱壽至百歲者旌表等語今劉守智等應令該撫轉行地方官照例各給銀三十兩聽本家自行建坊其旌表字樣交與內閣撰給

處女守喪自盡旌表

康熙五十年月禮部題正紅旗河南佐領下護軍六格聘定廂紅旂閒散瓦色之女爲妻未娶六格病故女聞訃卽往六格家剪髮穿孝願守夫墓奉養老姑三年以盡婦道殉節至六格三週年祭墓完畢回家縊死查婦從夫亡已于二十七年五月內奉

旨禁止但六格之妻並未過門處女守節三年從容盡節事關聖世風化應否旌表伏候上裁奉

旨着照例旌表

處女自盡旌表

康熙五十二年六月禮部覆准直撫趙疏稱大名縣民

徐日新之女福姐自幼許周文魁之子周官爲妻尚未完
姻伊夫病故福姐聞訃卽往穿孝守節孝養翁姑終年絕
食十六日身死從容就義非一時輕生可比應否照六格
妻之例旌表等因應如所題照六格妻之例准其旌表給
銀三十兩建坊

強姦不從致死旌表

康熙四十五年二月禮部覆准廣撫郭 疏稱海隅縣民
楊允昌妻潘氏被蕭阿宗強姦不從被毆身死克全婦道
等因查定例內凡強姦不從以致身死者照例旌表應行
該撫給銀三十兩聽從本家建坊

割股不隹旌表成案

康熙三十二年三月吏部題覆晉撫葉 一疏臨汾縣已
故孝子賈從父母病篤兩次割股父母歿後克盡孝行題
請旌表前來查割股臥冰不隹旌表應將該撫所請之處
無庸議奉

旨依議割股旌表久有定例葉穆濟並不詳察將賈從准其題
請旌表殊屬粗鄙著嚴飭行

禁官員建祠立碑

康熙九年十二月吏部覆准監察御史李 一疏查見任
官員立祠立碑徧布歌謠俱屬民間逢迎見任之官或係
官迫勒所立亦未可知除先經離任建立年久者不議外
應通行直隸各省總督巡撫查見任官員有建祠立碑者

拆毀以後見任官員建祠立碑邀譽刊布歌謠未行禁止
如有見任各官仍違禁建祠立碑邀譽刊布歌謠者司道
府州縣官員查報督撫題叅司道府州縣官員若不行查
報督撫一并指名題叅

萬壽亭不許借端修葺

康熙二十九年二月江督傅 題建萬壽亭一疏奉

旨蠲免錢糧原欲小民物力稍舒漸登殷阜前經頒有諭旨民
間建立碑亭稱頌德意雖出羣黎愛戴之誠但恐致損民力
這碑閣地方官嗣後不得借端修葺致滋擾累該部知道碑
刻并發

辭慶賀保安諭

康熙五十二年三月十八日恭遇

皇上六旬慶賀禮儀會同大學士九卿詹事科道詳議奉
旨朕御極以來惟欲萬國乂安上則敬

天法

祖下則垂令名於後世孜孜然以致鬚髮盡白心血耗散歷盡憂勞
蕩平險阻自古帝王在位不久享年不遐者論者往往歸於
別故而未諒帝王之實有所不勝實不堪其勞憂懼所迫以
致短祚也朕反覆思維帝堯固辭華封之祝必俟朕臨蒞年
久之君方能知聖人言之有實也餘則不能知矣朕本涼德
惟賴

祖考得國之正積福之深在位五十餘年壽屆六十憂勞倍增血

氣所憊唯恐愈久而力不支願不遂以致不全終始一世勤瘁俱屬徒然朕惟知惕勵而已並無留心祈求甲子之周也覽禮部請旨之奏悉係虛文無有實際朕惟願爲臣清正爲子孝思弟兄友愛人人皆讀正書勉盡職業國安民治盜賊寧息各以血誠實意爲朕六袞慶祝卽嘉納此外之儀朕無所嗜亦無所好這所奏不准行

福撫滿 爲

聖主萬壽等事一疏奉

旨凡碑亭不必建造已有諭旨甚明滿保于九仙山建造碑亭

不合着飭行

東撫蔣 爲報泰安山念經起程日期事奉旨此後凡山上廟內念經之事不必奏聞

康熙五十二年三月奉

上諭王貝勒大臣九卿詹事科道朕昨日進京見各處爲朕六十萬壽慶賀保安祈福祝延者不計其數朕實涼德自覺愧汗從來帝王之治天下固以民生爲念若爲一己之私卽不能擴而充之矣朕若先知必止之今已成矣難毀衆志夜來思之達旦朕所以爲天下萬國蒼生之主者萬姓安卽朕之安天下福卽朕之福若能祈禱雨暘時若家給人足則朕安寢飽食可以却病延年此朕之求福非有妄想也傳之各處凡有延祝者必求雨暘時若萬邦咸寧爲先朕已老矣有若無實若虛夙夜匪懈履薄臨深之志與日並增豈敢自有滿假乎

禁止私建菴觀寺廟

豐

卷下 風化

三

康熙五十年十二月禮部覆准左都趙 條奏僧道所居
寺廟踪跡無定負罪逃遁之徒逞逞借以竄匿匪類潛藏
實爲地方隱害若不嚴加禁止藏奸釀禍恐有不可知者
請通行嚴禁等語應如所題行令直省嚴飭地方官除見
在寺廟外不許創造該僧道官不時嚴查按季取具甘結
呈報并不許容留外來可疑之人一併嚴飭京城僧道等
官如有故違依律治罪創造寺廟仍行拆毀將僧道官並
地方官一併治罪等因奉

旨依議近見直隸各省創建寺廟者甚多建造寺廟則佔踞百
姓田廬旣成之日愚民又爲僧道日用湊集銀錢購買貧人
田地給與以致民田漸少且游民充爲僧道窩藏逃亡罪犯
行事不法者甚多實擾害地方大無益于民生者也着各省
督撫及地方官除原有寺廟外其創建增造永行禁止

冒濫鄉賢奉祀

康熙七年三月禮部覆東撫周 一疏查前任山東學道
王鑑任內准過通省鄉賢六百五十八名又鄉賢子孫奉
祀一千一百一十五名冒濫已極嗣後各直省學道遇有
鄉賢務須核實年終造冊報部勿得徇情冒濫如有此等
私給衣頂奉祀者俱盡行黜革奉

旨據奏鄉賢自漢朝至今共四百八十二人從古以來賢者誠
爲難得今王鑑三年內准過鄉賢六百五十八名又私給與
鄉賢子孫生員頂帶一千一百餘名有玷于真賢清行廉恥

過喪殊為可惡理應革職從重治罪俱在赦前著以見在品級致仕永不敘用地方官員亦應行查從重處分因係赦前寬免著嚴飭行又爾部所議限定賢數不合著交與該撫將果有善蹟的確察開報其無善蹟的亦確查革除餘依議

入祀取印結

康熙十九年三月禮部咨請禁冒濫等事一案雖確查實蹟並無該地方府縣印結咨送與例不合不准入祀

入祀故未一載

康熙二十四年四月禮部咨覆原任陝撫杭 故官黨崇雅黨恂與例相符准其入祀至學道俞陳琛病故未及一載尚未論定故舉人齊國儒無病故年月日期俱不便准

其入祀

入祀無病故年月

康熙二十五年閏四月禮部咨查鄉賢金之純張勇高愉等入祀並無病故年月日期不便遽准入祀相應咨回該撫查明到部之日再議

禁設會館

康熙二十九年十二月吏部題定各省會館係各省候選官員鄉試之人居住恐有不肖官員在會館囑託妄為亦未可定嗣後若有設立會館者或科道糾叅或傍人出首將所設立會館之人交與該部嚴行治罪

禁認同鄉同年

禮部覆准科臣胡 疏稱伏讀

世祖皇帝詔內投認有禁徇私有禁俱在不赦之條惟是同鄉同年之故習未經嚴飭臣今所以鯁鯁過計者正恐漢官仍蹈故習視同鄉同年之私情爲重不能盡力洗滌以著公忠伏乞

皇上睿鑒嚴禁施行應如科臣所請

勅下內外大小各漢官如有仍蹈故習同鄉同年有黨同者許科道官據實指名題叅從重議處

嚴禁士子進來宴會

康熙二十九年五月禮部覆准御史許 疏稱凡士子不許聯社刻稿及一切淫詞時擬遍送見任官員而見任官

員亦不許與之往來宴會倘有棍徒營求駢騙及匿名誣謗等情責令五城司坊不時緝拏依律治罪等語查學政全書內開孝弟廉讓士子立身大節其敦本尚實行誼表著者核實卽加獎勵若平日不務學業囑託把持武斷包攬或捏造歌謠興滅詞訟及敗倫傷化過惡彰聞者體訪得真卽行黜革等語應將學政全書項欵併御史許 疏內各欵通行嚴禁在京貢監等如有前項不肖之徒許五城司坊官拏送該部治罪如司坊官不行察拏事發一併叅處其見任官員亦不許與應試士子往來宴會如有違者被科道題叅交該部議處又疏稱各省學臣應嚴行課士三年之中果能閉戶潛修者作何獎勵馳逐虛名者作

何懲戒事竣造冊報部等語查各省生員行優者卽加獎勵行劣者卽行懲戒此係學臣專責若以懲獎生員之多寡爲學臣之殿最恐學臣借名懲獎恣意妄行以圖上考不便以此爲殿最如學臣不分別生員優劣有徇情隱庇之處該督撫題叅照例議處

保全清官論

康熙五十年十月九卿詹事科道面奏噶禮張伯行互叅一案奉

上諭從古治天下者莫要於至公朕御極五十餘年凡內外大小之事皆以公心處之觀近日外官滿洲所叅大抵多漢人漢人所叅大抵多漢軍皆非從公起見朕悉據理處斷並無偏向張伯行居官清廉一文不取天下人所共知其家亦殷實朕巡河工時適彼爲按察使知之甚悉但才具畧短耳噶禮辦事歷練至其操守則朕不能信若無張伯行在彼則江南地方受其腹削一半矣彼目前礙于張伯行不無日後受財之意語云文官不愛錢武官不惜死然後天下乂安又云清官不累民朕自幼讀書研窮性理如此等清官朕不爲保全則讀書數十年何益卽凡爲清官者亦何所倚恃以自安乎如蕭永藻富寧安張鵬翮趙申喬施世綸殷泰張伯行李陳常此數人皆清官朕皆愛惜保全昔日趙申喬任偏沅巡撫時居官甚清但有性氣人皆畏其口直後與俞益謨互相訐叅彼時亦有以趙申喬爲非者朕細加察訪卽彼所轄武

官及陝西人良心不昧俱言俞益謨之非無有以趙申喬爲不是者清官固所當惜而其言之不可行者朕亦不行如趙申喬條奏黃河坍地免糧一事朕亦不准行雖所言未當而並無私見凡交與伊事件皆實心辦理朕是以護惜之至陳鵬年稍有聲譽學問亦優噶禮之欲害之也久矣張伯行亦聽信陳鵬年之言是以噶禮與之不和屢次具摺欲叅朕以張伯行天下第一清官不可叅他各省督撫具摺來奏朕俱硃筆親批付之從未有令其叅一官者彼皆收藏有據朕恐異日遺累於彼不留一字爾等內有爲督撫及見在大臣具摺者皆知之以此見朕事無大小以誠相待也噶禮曾將陳鵬年虎丘二首奏稱內有悖謬等語朕閱其詩並無干礙朕

纂輯羣書甚多詩中所用典故皆知之卽末句鷗盟一句不過託意漁樵凡作詩者喜時則語多歡娛失意則詞多拂鬱如在全篇中指摘一二語以害人則人皆不能免陳鵬年其詩見非無據者今與爾等公看可知朕心之公矣噶禮叅李麟騎射俱劣李麟在口迎駕朕試彼騎射因被總督所叅之人並未下旨今李麟見在若令噶禮與之比試定不能及彼時朕已心疑噶禮矣倘噶禮先具摺奏聞朕必不准其叅奏也噶禮張伯行互叅一案初次遣官往審被噶禮制定不能審出及再遣官往審與前無異爾等俱係大臣既知張伯行清官當會議時何無一言朕既有諭旨爾等方贊其清亦晚矣朕因保全清官不但文臣鼓舞而武臣亦皆感勵如師懿

德江琦額倫忒俱稱清廉湖廣空糧甚多鄂海額倫忒抵任以來補過二千五百名營伍亦甚整飭爾等諸臣皆能體全清官至公之意使爲正人清官者無所疑懼則人俱欣悅海宇長享昇平之福矣

禁止殉葬

大清會典天聰八年定婦人有願殉夫者止許正妻殉葬仍行旌表一應媵妾不許殉葬若妻強逼侍女殉葬者其妻坐死如違律自殉者夫族兄弟各議罰出首人許離本主康熙十二年定旂下本主強逼奴婢殉葬者嚴行禁止

禁奴僕殉葬

康熙十二年六月禮部覆准科臣朱 疏稱旂下風俗本

主臨終多問奴僕跟隨殉葬一經然諾其人卽經經而死或畏其威而不敢不從或懷其德而不忍不從請

勅該部通行嚴禁等因查奴僕隨主殉葬從來未有此例且人命關係重大本主逼勒奴婢致死或畏威跟隨亦未可知相應將奴婢跟隨本主殉葬之處嚴行禁止通行八旂包衣佐領並直隸各省遵行

禁夫亡從死

康熙二十七年五月和碩裕親王題定嗣後自王以下以及小民夫亡從死者相應停其旌表仍未行禁止以仰副皇上好生至意如有必欲身殉者內而該佐領驍騎校報明都統移會禮部外而該管地方官報明督撫俱行奏聞請

旨定奪通行八旗包衣佐領並直省一體遵行

收埋枯骨

康熙二十四年五月禮部覆准科臣任 疏稱戒飭天下有司所在設立義塚凡無主遺棺務令藏掩軍興地方尤宜加意收瘞等因應仍照順治九年例各直省地方如有無主暴露枯骨著該督撫責令各地方官設法料理建立義塚將料理之處咨報臣部

迎春糜費

康熙十二年二月禮部覆准臺臣魏 條奏嗣後直隸各省府州縣迎春務照戶部頒定止用鼓吹彩亭各官拜迎芒神土牛其催鹽商當舖行戶粧扮故事亭閣臺榭設列金塊珠礫張鼓樂樹旂幟併科派里長提取馬匹車輛伶人娼婦等項相應嚴行禁止如有前項糜費並各官多派民間該督撫科道官題叅交與該部議處

禁大頭和尚

康熙二十七年十二月禮部題查康熙二十六年臣部具題年節放紙花炮及耍大頭和尚唱稻秧歌乃小民行樂之事應照常頑耍須小心火燭其放起火打大鼓鑼並打有把神鼓頑耍原係禁止具題奉

停止酒禁

旨大頭和尚稻秧歌亦曾有人條陳應行禁止餘依議
康熙二十一年八月戶部題覆臺臣任 請弛燒酒之禁

一疏奉

旨蒸造燒酒不必禁止

禁止燒鍋

康熙三十五年正月奉

上諭嚴禁燒鍋又康熙三十七年三月戶部咨爲嚴禁燒鍋事照得直隸山東山西河南盛京五處蒸造燒酒耗費米穀甚多以致米穀價值騰貴相應轉咨都察院轉行五城并直隸等處五省及八旂并包衣嚴行禁止燒鍋令該管官員不時查拏如有違禁私開燒鍋者從重治罪

風箏鴿鈴

康熙三十四年三月刑部准九門提督咨口奏近見放風

箏繫鈴鴿尾者甚多相應禁止奉

旨風箏原係禁止之物將放風箏鴿尾繫鈴者着嚴行查拏欽此傳知八旗

扶鸞書符

康熙四十八年四月禮部覆准御史張一疏查扶鸞書符招搖賣緣之輩該地方官卽行拏究治以違禁之罪若該地方官不實心查拏將該地方官指名題叅一併治罪

聽政儀注

第九

大清會典凡御門聽政每日

皇上御乾清門設

御榻于門之正中設章奏案于

御榻之

前部院大小官員每日早赴午門外齊集春夏于卯正一

刻秋冬于辰初一刻進至中左門候春夏于辰初初刻秋

冬于辰正初刻進至後左門該直侍衛轉奏候傳

諭進奏直日侍衛隨諸臣俱至乾清門丹墀東傍西向排立

起居注滿漢官于丹墀西旁東向立

皇上御門陞座侍衛從丹墀下石欄旁東西排立

起居注官

由西階陞至簷下侍立部院大小官員接日輪班依次由

東階陞堂官捧舉奏章先詣案前跪置畢轉至東旁西向
跪奏如應用綠頭牌啓奏事宜亦由堂官捧至 御榻前
西向跪奏各官俱照品級跪于堂官之後每一衙門奏事
畢各官仍由東階照品序退次一衙門進奏如前儀其啓
奏序次吏戶禮兵工五部理藩院都察院通政司大理寺
輪班先後啓奏若宗人府奏事在各衙門之先若太常寺
光祿寺鴻臚寺國子監欽天監奏事在禮部之後督捕太
僕寺奏事在兵部之後五城奏事在都察院之後若內閣
翰林院詹事府奏事在各衙門之後若刑部奏事每日在
第三班各衙門官於奏事畢時各依次第隨侍衛由後左
門出內閣學士每日收所奏本章如有折本事宜大學士
學士面奏請

旨畢退

皇上還宮

入朝跟隨員役名數

大清會典順治九年題准凡滿洲諸臣入朝除內大臣護軍
統領護軍叅領侍衛以外其餘諸王及公侯伯大臣以下
各部院衙門官員俱由午門進不許由東華門西華門神
武門進凡進午門時親王許隨護衛六員世子郡王隨護
衛五員貝勒隨護衛四員貝子隨護衛三員公隨護衛二
員民公侯伯都統精奇尼哈番護軍統領副都統尚書侍
郎許隨人役一名其餘官員不許隨從人役

康熙元年題准凡親王以下公以上進午門時隨從人數
照順治九年例如詣

皇上前止許隨護衛一員

凡官民人等孝服白帶摘纓者不許進紫禁城

文武官員跪見

康熙七年正月禮部等會議覆准臺臣楊 疏稱臣昔備
員庶常侍從

世祖皇帝凡引 見皆跪念本身籍貫今臣因本衙門諸臣引

見二次未行跪禮及雜項引 見官俱不行跪禮恐于尊

君之禮未合請

勅誠部臣以後引 見務尊舊例俱行跪禮等語查陞轉文武

官員引 見行禮並未另有定例但人臣入對 君父無

不跪 見之理嗣後凡陞轉文武官引 見俱行跪禮

上朝啟奏齊集午門

康熙二十一年五月大學士勒 等奉

上諭部院衙門大小官員俱分班啟奏甚或一部份作數班朕
與爾等皆每日曉起部院官員分數班啟奏不合嗣後滿漢
大小官員除有事故外凡遇啟奏事宜俱着一同啟奏都察
院衙門及科道官員無逐日啟奏本章着每日黎明齊集午
門如滿漢部院官員怠惰規避者卽行察叅又大小各衙門
滿漢官員雖該衙門無啟奏事宜亦着每日同啟奏官員黎
明齊集午門俟啟奏各官事畢同散如怠惰規避不於黎明

齊集者亦着都察院及科道官員察出叅奏特諭

啟奏科道侍班

康熙二十五年四月禮部覆准掌院學士常 條奏查凡慶賀之日及

皇上每月三次陞殿之日俱滿漢監察御史監禮又春秋二季經筵滿漢科道官員監禮又會典內開啟奏處御史侍班糾儀等語自今以後啟奏處滿漢科員各一員滿漢道員各一員在兩傍侍班各部院衙門及科道官員條陳或有跪立陞降一切失儀許指名題叅此侍儀滿漢科員在乾清門東傍簷下滿漢官員在西傍起居注官之次立侍糾儀候啟奏畢退時退出

大臣與諸王會議不跪

康熙二十七年三月宗人府題覆吏科高 一疏奉

旨朕召大臣議事如時久每賜墊坐語大臣與諸王會議即行跪禮不符嗣後凡會議公事大臣不必向諸王行跪

迎送欽差請安

康熙二十三年十二月禮部題定向日部院微員筆帖式因公出差該地方大臣俱向其請安迎送殊違大典嗣後皇上近侍大臣及部院衙門大臣通政司通政大理寺卿詹事府詹事以上大臣出差直省者經過地方之將軍督撫提鎮副都統總兵官以上准其請安不許擅離本地方職守請安自此以下官員不准請安除齋送

前音員例
詔旨仍行迎送外若部院衙門官員筆帖式烏林人等出差者
將軍督撫等官以下各官俱應停其迎送亦不准請安違
此定例者交與該部議處其官員筆帖式烏林人或有差
遣之處該部院衙門堂官各宜嚴加申飭

停止預迎請安

康熙三十四年正月大學士伊 等奉

上諭嗣後來京督撫提鎮等官往來沿途大職官員預迎請安
者着未行停止特諭

請安定式

康熙四十一年十月大學士 等奉

上諭直隸山東巡撫總兵等官凡有欽差侍衛大臣經過地方
理應請安其餘如出差部院官員筆帖式及來京織造府並
調來陛見等官經過地方督撫提鎮每每請安彼部員筆帖
式未必得見朕之面如此混行請安殊失大體嗣後除欽差
侍衛大臣外凡部員筆帖式織造府及陛見等官不得槩行
請安爾等卽移文各省通行諭知

朝冠朝服不整

康熙二十三年 月禮部題定朝服朝冠俱關大典理宜
整肅嗣後各官有朝服朝冠不整及以針釘者令禮部吏
部司官都察院御史稽察朝班者嚴查題叅

讓道

大清會典康熙十八年更定

親王出行郡王遇讓道行貝勒遇執事迴避讓道旁行貝子鎮國公固倫額駙和碩公主額駙遇勒馬鞠躬側立道旁候過輔國公鎮國將軍民公都統尚書以下遇俱下馬立道旁候過固倫公主和碩公主遇相讓尊長在先分路行郡主以下縣君以上遇停車候過

郡王出行貝勒公主以下遇與遇親王迴避儀同

貝勒出行貝子鎮國公固倫額駙和碩公主額駙遇讓道旁行輔國公鎮國將軍民公都統尚書遇勒馬側立道旁候過輔國將軍副都統侍郎等官以下遇俱下馬立道旁候過固倫公主和碩公主遇貝勒讓道行郡主縣主郡君遇相讓分路行縣君遇停車候過

貝子出行鎮國公和碩公主額駙遇分路行輔國公鎮國將軍民公都統尚書遇讓道旁行輔國將軍副都統侍郎及叅領等官遇勒馬側立道旁候過佐領等官以下遇俱下馬候過固倫公主和碩公主遇貝子勒馬候過郡主縣主遇貝子讓道行郡君縣君遇相讓分路行

鎮國公出行輔國公鎮國將軍民公都統遇分路行輔國將軍副都統侍郎及叅領等官遇勒馬立道旁候過佐領以下等官遇俱下馬候過

輔國公出行鎮國將軍都統尚書等官遇分路行輔國將軍副都統侍郎等官遇讓道旁行奉國將軍叅領佐領等官遇勒馬道旁候過護軍校驍騎校等官及軍民人等俱

下馬候過

鎮國將軍出行輔國將軍副都統侍郎等官遇分路行奉國將軍叅領等官遇勒馬道旁候過護軍校驍騎校等官及軍民人等遇俱下馬候過

輔國將軍出行奉國將軍叅領等官遇讓道旁行佐領等官遇勒馬候過護軍校驍騎校等官及軍民人等遇俱下馬候過

奉國將軍出行佐領等官遇讓道行護軍校驍騎校等官及軍民人等遇俱勒馬候過

凡閒散宗室遇親王以下輔國將軍以上俱下馬遇民公以下大臣俱不下馬

凡覺羅有職者各照品級迴避無職者遇親王以下輔國將軍以上俱下馬遇民公都統尚書等官俱引馬迴避其餘各官俱不迴避讓道行

凡奉 欽差及賁捧

勅旨或 欽賜恩賞者遇王等於道及過王府門不下馬

親王府門郡王過併隨從人員俱不下馬貝勒過鞠躬趨馬過隨從人員俱下馬貝子民公以下官員及軍民人等過俱下馬

郡王府門與親王同

貝勒府門貝子鎮國公過不下馬隨從人員俱下馬輔國公民公以下官員及軍民人等過俱下馬

固倫額駙出行鎮國公和碩公主額駙遇分路行輔國公
鎮國將軍民公都統尚書等官讓道旁行輔國將軍副都
統侍郎及叅領等官遇勒馬道旁候過佐領等官以下遇
俱下馬候過

超品公和碩公主額駙出行都統精奇尼哈番尚書等官
遇讓道旁行副都統侍郎叅領等官遇勒馬道旁候過佐
領等官以下遇俱下馬候過

民公郡主額駙出行都統精奇尼哈番尚書等官遇分路
行副都統侍郎等官遇讓道旁行叅領佐領等官勒馬道
旁候過護軍校驍騎校等官及軍民人等俱下馬候過
都統精奇尼哈番尚書縣主額駙出行副都統侍郎等官

遇讓道旁行叅領佐領等官遇勒馬道旁候過護軍校驍
騎校等官及軍民人等俱下馬候過

內大臣副都統護軍統領前鋒統領郡君額駙大學士侍
郎等官出行叅領等官遇讓道旁行佐領等官遇勒馬候
過護軍校驍騎校等官及軍民人等俱下馬候過

一等待衛護衛叅領阿達哈哈番郎中縣君額駙等官出
行佐領員外郎拖沙喇哈番主事等官遇讓道旁行護軍
校驍騎校等官及軍民人等遇俱勒馬候過

二等侍衛護衛拜他喇布勒哈番佐領員外郎鄉君額駙
拖沙喇哈番主事等官出行護軍校驍騎校等官及軍民
人等遇讓道行

凡民公以下文武各官命婦俱照本夫迴避例

各官相見儀注文移

順治十八年十二月禮部會議更定

先定提督總兵官與總督相見文移總督用劄付提督總兵用咨呈相見俱由中門進提督總兵至總督儀門外下馬總督至提督總兵堂前下轎坐次總督上坐提督總兵旁坐提督總兵有加總管衙者坐次總督居左提督總兵居右

今更議得相見文移總督提督俱用咨文提督往總督衙門去總督迎至儀門提督二門外下轎馬入衙門坐次總督在中正坐提督僉坐送至迎處總督往提督衙門去提督迎出儀門總督儀門下轎馬進衙門坐次總督在中正坐提督僉坐送至迎處

先定總兵與總督相見由中門進向上三揖總督站立答禮後堂待茶總督正坐總兵旁坐迎送至簷下

今更議得總兵見總督文移總督用照會總兵用咨呈總兵往總督衙門去由中門進至二門下馬總督出簷迎至階上進衙門坐次總督居中正坐總兵在旁側坐總督往總兵官衙門去坐轎由中門進儀門內下轎總兵迎出儀門坐次應照與總督衙門相見同送至迎處

先定提督總兵與巡撫相見坐次文移俱平行如加銜巡撫者提督總兵於儀門外下馬

今更議得不拘兼部銜相見俱行賓主禮文移俱用咨文
先定總兵官與巡撫相見俱至儀門下轎迎送俱至上下
轎處總兵見巡撫川堂待茶巡撫拜總兵大堂列坐文移
往來俱用手本

今更議得總兵與巡撫相見俱行賓主之禮文移俱用咨
文

先定司道分司運使與提督總兵相見俱平行

今更議得司道分司運使與提督總兵相見文移提督用
照會司道分司運使用咨呈司道等官見提督二門下轎
馬提督迎出簷下至堦坐次提督正坐司道等官側坐提
督見司道等官儀門下轎馬司道等官迎出儀門坐次照

前同送至各迎處

先定司道分司運使與總兵相見俱平行

今議得各不相轄應仍照舊文移俱用咨文

先定知府同知通判推官與提督總兵相見坐次文移俱
平行知府等官至提督總兵二門外下轎

今更議得知府同知通判推官與提督總兵相見文移知
府同知通判推官用牒呈提督用劄付知府同知通判推
官往見提督大門外下轎馬由中門進坐次提督正坐知
府同知通判推官傍坐提督迎送至簷下

先定知府同知通判推官與總兵相見俱平行

今更議得知府同知通判推官見總兵二門下驕馬總兵

元音貝
迎至簷階坐次總兵正坐知府等官傍坐總兵見知府同
知通判推官儀門下驕馬知府等官迎出儀門外坐次照
前徃來文移總兵用照會知府同知通判推官用咨呈各
送至迎處

先定州縣見提督總兵大門外下馬由東角門進至堂簷
下跪稟拜免茶房待茶提督總兵正坐州縣傍坐茶畢稟
辭由西角門出文移提督總兵用故牒州縣用申文提督
總兵官不看拜

今更議得州縣與提督文移用申文提督與州縣用劄付
州縣見提督大門外下驕馬由東角門進提督不迎送
先定州縣官見總兵官大門外下馬由東角門進至堂簷

下跪稟拜免茶房待茶總兵正坐州縣傍坐茶畢告辭由
西角門出文移總兵用故牒州縣用申文總兵不看拜

今更議得州縣官見總兵大門外下驕馬由中門進至衙
門坐次總兵正坐州縣官在傍側坐文移州縣用咨呈總
兵用照會總兵官迎送至簷下

先定副將見總督用履歷手本披執進見行一跪一揖禮
出更衣再見行一跪稟拜免拜仍行一跪一揖禮畢簷下
側立待茶行禮謝茶出傍立三躬如無府銜者不待茶
今更議得副將叅將掌印都司見總督用履歷手本其跪
披執等禮俱免大門下馬由角門進總督迎送至簷下

先定副將見巡撫稟見披執隨出更衣廷叅待茶加府銜

禮部則例 卷二
者先稟披執准免然後照司道事例進見俱在川堂待茶
出送至月臺中副將候入煖閣連三揖出隨看拜無府銜
者不迎送看拜副將管叅將事見巡撫者走角門行廷叅
禮用脚色手本

今更議得副將見巡撫免披執廷叅由中門進副將至巡
撫儀門外下馬巡撫迎送至簷下坐次巡撫上坐副將傍
坐巡撫往副將衙門去至堂前下轎副將出儀門外迎送
往來文移巡撫用照會副將用咨呈不拘加銜巡撫

先定副將與布按二司相見俱平行文移用手本走按察
司夾道門

今更議得各不相轄免行夾道門俱行賓主之禮往來文
移俱用手本

先定副將與各道相見俱平行文移用手本協守副將會
道二門外下馬由中門進本道迎至月臺下堂上待茶畢
本道送至二門外看乘馬

今更議得各不相轄俱行賓主之禮往來文移俱用手本
先定知府同知通判推官與副將相見各不相轄俱平行
今更議得知府同知通判推官與副將相見文移俱用手
本行賓主之禮

先定州縣見副將用官銜手本大門外下馬進中門由甬
道邊至堂簷下向上三躬副將還禮後堂待茶送至堂口
大門外上馬副將用照會州縣用牒呈

今更議得州縣見副將用官銜手本大門外下馬進中門
由甬道邊副將迎送至簷下副將用照會州縣用牒呈免
州縣三躬

先定各部分司與副將相見俱平行

今更議得俱行賓主之禮往來文移俱用手本

先定運司與副將賓主往來兼無轄制

今應仍照舊往來文移俱用手本

先定叅將遊擊見總督用履歷手本披執見行一跪一揖
禮出更衣再進見行一跪一揖稟拜免

今更議得遊擊以下各武官見總督免披執跪叩止行一
跪三叩頭禮仍用履歷手本

先定叅將遊擊見巡撫由角門進到捲棚中行全屬禮耳
房待茶出仍行全屬禮旁立三躬出

今更議得叅將遊擊見巡撫免行全屬禮大門外下馬由
中門進至衙門坐次巡撫正坐叅將遊擊在傍側坐文移
巡撫用劄付叅將遊擊用牒呈巡撫迎送至簷下

先定叅將遊擊與布按二司相見俱平行文移俱用咨叅
將走按察司夾道門至二門下馬掩門川堂待茶劄委者
不在此例

今更議得劄委者不議外餘行賓主之禮文移仍用咨免
行按察司夾道門

先定叅將遊擊會各道分司運使二門外下馬由中門進

本道迎至川堂待茶仍送至二門外看乘馬文移手本平行劄委者不在此例

今更議得劄委者不議外行賓主之禮仍用手本

先定知府同知通判推官會叅將遊擊俱行賓主彼此用名帖文移平關

今應仍照舊

先定州縣官與叅將遊擊相見俱平行

今更議得各不相轄仍照舊往來文移俱用手本

先定都司見巡撫掌印專闡坐省都司與營伍都司不同初次謁見先稟披執行廷叅禮隨更官服隨二司進見稟拜或吩咐免隨行三常揖禮布按二司與掌印都司同禮

畢卽掩門後堂待茶畢仍至前堂三司打躬出隨三司不跪單見仍行跪揖禮僉書操捕都司掌印都司專闡都司舊例相同行都司見撫院行禮畢掩門待茶謝茶畢打三躬又各都司遇閱操與霜降揚威之日俱披執進叅出換服再進照司道例待茶

今更議得掌印都司專闡都司行都司屯田都司操捕都司衛守備守禦所千總衛千總等官見巡撫其披執全屬等禮俱免至于守禦所千總衛千總行一跪三叩頭禮俱大門外下馬由角門進巡撫不迎送與各都司文移用劄付各都司用申文巡撫下行文與守禦所千總衛千總等官用牌票守備千總等用申文

先定各都司見布按二司與叅將遊擊同劄委者不同
今更議得劄委者不議外亦行賓主之禮往來文移俱用手本

先定各道與掌印僉書操捕各都司俱平行劄委者不在
此例其餘管將都司行廷叅禮屯田都司與本道行廷叅禮

今更議得各道掌印都司操捕都司都司僉書營都司屯田都司分司運使俱平行往來文移俱用手本

先定都司與知府同知通判推官俱平行文移俱用平關
今應仍照舊

先定都司與州縣俱平行

今應仍照舊往來文移俱用平關

先定分防標下中軍係部推守備見撫院披執稟見掌印
守備見撫院走角門至簷前行廷叅屬禮初次披執行禮
各專城并道標中軍及各營中軍守備見撫院走角門至
簷前行廷叅屬禮初次披執行禮各衛掌印守備見撫院
行全叩禮

今更議得各守備見撫院免披執屬禮大門外下馬由角
門進巡撫不迎送巡撫用劄付各守備用申文

先定守備見布按二司用脚色手本行廷叅禮文移用申
呈初見披執行禮加都司銜者仍行守備禮

今更議得各守備見布按二司免披執廷叅用官銜手本

大門外下馬進中門由甬道邊布按二司迎送至簷下文
移布按二司用照會各守備用牒呈

先定守備見各道行廷參禮新任披執進見出換官服進
仍行廷參禮

今更議得守備見各道免披執廷參用官銜手本大門外
下馬進中門由甬道邊各道迎送至簷下各道用照會各
守備用牒呈

先定各守備見知府同知通判推官用手本行屬禮文移
用呈知府行照會同知通判推官用官銜帖文移平行
今更議得不相轄各行賓主之禮俱用手本
先定州縣會守備俱平行

今應仍照舊俱用手本
先定守備等見分司堂前行禮分司答躬文移守備用呈
分司用牌票

今更議得不相轄各行賓主之禮俱用手本
外守省將軍總管與總督巡撫提督總兵官相見各不相
轄俱各行賓主之禮往來文移俱用咨其餘以下文武各
官見守省將軍總管俱照見總督禮行

滿職與督撫儀注

康熙二十二年五月禮部題定固山大防禦章京各官與
督撫相見儀注駐防固山大叅領等官赴督撫衙門照布
政按察兩司例行佐領防禦等官照各道員例行驍騎校

以下官照知州知縣例行

各關監督儀注

康熙二十九年六月禮部覆准福督典一疏查順治一十八年所定文武相見儀注文移遣返迎送等處俱經議定又康熙十二年題

萬壽元旦等節行禮將軍總督加將軍銜提督在一班副都統提督巡撫加左右都督銜總兵官在一班加都督同知以下總兵官固山大叅領巡監御史織造郎中關稅郎中布按兩司在一班佐領關稅員外郎各道副將叅將掌印都司在一班拖沙喇哈番關稅主事知府司庫同知通判遊擊都司在一班驍騎校知州知縣守備在一班有品級筆

帖式有品級烏林人經歷州同州判縣丞千總在一班等語又查各關監督

勅書內有不屬督撫所轄等語嗣後凡遇慶賀齊集行禮之處各關監督官員筆帖式各論品級遵康熙二十二年所定行禮外其關稅監督或郎中或員外郎主事品級雖殊衙門職掌則一應照順治十八年所定儀注不論郎中員外郎主事凡監督衙門如行文職衙門則照總兵官相見文移一體行如行武職衙門則照藩臬道員與武官相見文移一體行但此儀注內總兵與巡撫平行今監督與巡撫相見文移若照此例屬過嗣後凡監督與巡撫俱照與總督相見文移例一體行至於稅差筆帖式帶往記寫檔案

並無職掌亦無另有所行之事凡關差官員與地方官公
事相見之處筆帖式停其同往等因具題奉

旨各監督議與總兵官相等太過著再議具奏欽此再議得各
關監督與總督巡撫相見及用文移之處俱照副將與巡
撫相見行之例行至司道官員以下官員相見行文之處
亦照副將例行餘仍照前議

廳員衛守備儀注

康熙二十年十一月禮部覆准直撫 題宣屬廳員一疏
議得衛守備與廳無轄仍行賓主禮奉

旨這各路同知等官有專管稽察錢糧之責屯衛守備與營伍
守備不同着再議具奏又議得順治十八年所定儀注內既

有廳員屬官之禮嗣後仍應照舊定儀注例統轄

停朝服迎接差員

康熙三十三年十月大學士伊 等傳

上諭聞各省欽差大臣官員沿途文武官穿朝服迎接武職披
執迎接此迎接與理不合著停止

停真摺穿朝服

康熙三十三年 月禮部覆准刑科劉 條奏

一督撫開門視事任意遲早凡在屬員平明坐督撫之門
日晡方得散歸更有督撫同城南北一齊開門各官豈能
分身理宜無論冬夏確有定期先督後撫各不相紊等語
查地方有司各官均有錢穀刑名之責屬員守候恐致公

禮音貝
卷下
務廢弛嗣後督撫於清晨開門視事此開門時撫先督後
一在外每逢十五司道府廳州縣俱集督撫之門既散之
後府廳州縣仍相率而至司道府廳之門宜嚴行禁絕等
語查大小各官有公事不時稟見督撫逢五逢十稟揖之
處實屬煩文嗣後應將每逢五逢十督撫并司道等官俱
停其相見

一群臣衣冠朝服最嚴在內惟大朝坐班與祭郊壇在外
惟朝賀祭祀始宜著用今則無論大小上司屬官謁見皆
朝服頂帽等語查各官朝服頂帽理宜尊重不得濫行穿
用嗣後在外大小各官凡朝賀祭祀及到任許著朝服其
餘槩不許著朝服通行各直省督撫遵行

謁見迎送上司穿補服

康熙
一年四月禮部覆准吏科潘 條奏嗣後在京
官員遇元旦冬至

萬壽聖節

皇上陞殿常朝祭祀到任封印開印照常着朝服直隸各省官
員拜牌到任封印開印丁祭入場亦照常著朝服武職官
員除操演兵丁查點器械許照常披執外其文武各員謁
見上司迎送過達上司止許着補服如有違禁濫着朝服
並披執者一有發覺該部照違禁例議處

禁部屬私謁堂官

吏部覆准科臣成 疏稱各部司屬之于堂官同一衙門

元音具
朝夕相見卷案吏胥俱存公署於衙門之中辨衙門之事所言公公言之是也除問疾弔喪或遠出乍歸間行問勞外至于生辰令節不宜數至堂官之門必須嚴禁而後甄別時有真甄別考核時有真考核京察時有真京察所當禁止以尚恬靜等因嗣後司屬各官借名堂官生辰令節私相接見未行停止通行各部衙門

部屬司官侍班

康熙五十四年十二月大學士等奉

上諭部院漢司官作何與朕認識之處爾等會議具奏現今滿漢翰林等官亦跟隨行走欽此臣等會議得六部漢郎中員外主事及於主事同品官俱係各衙門辦事之員正途出

身中行評博考選科道之員相應於奏事之時挨次派出六員各衙門開出履歷籍貫繕摺交與吏部引

見週而復始其滿漢給事中向有侍班之例蒲漢御史亦應照此例于奏事之日都察院派出四員與給事中派出四員共八員侍班

服制 第十

冠服定制

大清會典

皇帝冠用東珠寶石鑲頂服黃袍束金鑲玉版嵌東珠帶

皇后冠用東珠鑲頂服黃色秋香

皇貴妃冠頂用東珠十二顆妃冠頂用東珠十一顆

嬪冠頂用東珠十顆

皇太子冠用東珠十三顆鑲頂服用秋香色束金鑲玉版嵌

東珠帶

親王冠頂三層共嵌東珠十顆帶用金鑲玉版四片嵌東

珠四顆

郡王冠頂三層上銜紅寶石中嵌東珠七顆帶用金鑲玉版四片嵌綠松石四顆世子貝勒貝子等各冠服等級不及備載

超品公冠頂上銜紅寶石中嵌東珠二顆帶用金鑲玉版四片

民公冠頂上銜紅寶石中嵌東珠一顆帶用金圓版四片嵌綠松石四顆

侯伯一品官等與律載儀制同

新進士冠用鍍金三枝九葉頂

狀元冠用起花金頂上銜水晶帶用玳瑁圓版四片銀鑲邊

民公侯伯用麒麟補或四爪蟒補

文官一品用仙鶴補 二品用錦鷄補 三品用孔雀補

四品用雲雁補 五品用白鸚補 六品用鸞鷲補

七品用鸚鵡補 八品用鶴鶉補 九品用練雀補

武官一二品獅補 三品虎補 今改豹 四品豹補 今改虎

五品熊補 六七品俱彪補 八品犀牛補

九品海馬補

凡朝服披領口准鑲蟒緞粧緞金花緞 都察院按察司

官不論品級俱用獬豸補 御前侍衛蟒緞粧緞各樣緞

皮服隨便用

親王親隨服色准照五品官 世子郡王親隨服色准照

六品官

儀制執事

大清會典順治三年定公掌扇貼方金一塊一品官掌扇貼圓金四塊二品官掌扇貼圓金三塊三品官掌扇貼圓金二塊四品官用灑金掌扇五六七品官用素黑掌扇八九品官用白掌扇

順治六年題定公以下四品官以上用大灑金扇一把小灑金一把文官用甘蔗棍一對武官用棕竹棍一對

康熙元年題定

公旗十桿杏黃傘二柄金黃棍二對執事人青衣綠帶紅氈帽銅頂上插綠翎京城內止用傘一柄

侯伯旗十桿杏黃傘一柄金黃棍二對執事人服色與公同

都統鎮國將軍內大臣滿漢大學士尚書左都御史等旂八桿杏黃傘一柄金黃棍一對執事人青衣綠帶紅氈帽銅頂上插綠翎

輔國將軍護軍統領前鋒統領副都統侍郎學士九卿正卿鑾儀使副都御史步軍總尉等旗六桿杏黃傘一柄金黃桿一對執事人與都統同

三品官執事與輔國將軍同

四品官旗四桿

凡加太師公金黃棍二對改爲紅棍二對棍頭銅鑲執事

人綠衣綠帶民公以下官員出京城許用鞍籠閑馬前導
軍民人等不許用違者治罪

在京官員執事

康熙八年八月禮部覆准臺臣李 疏稱查舊例大小文武官員在京從無用黃蓋黃棍行走之制至于筆帖式止供番譯書寫有品級而無職任近來在外各鹽差關差筆帖式俱坐轎張黃蓋鳴鑼喝道尤宜通行禁止查向來在京官員執扇甘蔗棕竹棍行走杏黃傘金黃棍相應停止民公和碩公主之和碩額駙以下滿洲四品官以上漢七品官以上俱照

世祖皇帝時定例在京內仍止許打扇甘蔗棕竹棍行走出京城許擎傘旂行走又順治九年定民公侯伯都統內大臣大學士尚書 皇城外許坐四人暗轎聽其騎馬其漢文官原不慣騎馬在京文官三品以上乘四人暗轎在京內漢武官應照會典不許坐轎其在外各差遣筆帖式等如有違例坐轎張蓋鳴鑼喝道行走者該地方官督撫查出指名題叅交與該部議處

在京滿漢官員執事

禮部題定宗人府府丞太常寺正卿叅領郎中等官以下用扇二把畫圓圖文武四品官甘蔗棕竹棍各一對用無圖扇二把滿漢五品六品七品官用素黑扇一把八品九品等官用白扇一把各執事一對行走學士副都御史阿

思尼哈番通政司大理寺正卿鑾儀使副都統侍郎品級
相同伊等乘轎打執事相應照副都統侍郎例宗人府啓
心郎府丞太常寺正卿叅領郎中等官以下文官用甘蔗
棍武官用棕竹棍都統尚書以上等官京城內除旂外打
傘行走副都統侍郎以下等官除傘旗外打棍行走

雨纓涼帽

康熙四十六年八月都察院題准爲遵 旨嚴察一疏奉

旨交與王貝勒朕聽得在家俱戴雨纓涼帽今大人官員爲此
關係甚大之處如何不知應該嚴查欽此遵

旨嚴查如有戴雨纓大人我們一面交與該部嚴加治罪一面
題叅外今看東門內大臣侍衛紫禁城內一切坐堆官兵
以至看守暢春苑章京擺雅喇等除下雨之外不戴雨纓
緯帽近見部院衙門大人并旗下閑散官上朝之時路上
遇見戴雨纓緯帽者甚多又看午門前上衙門之日部院
衙門官員戴着雨纓帽也有列班之時攙線纓者臣等更
加嚴察再午門前上衙門人等因爲俱是都察院官員查
班臣等要將

旨意轉傳中堂查官員上衙門之時交與該部嚴查

文職上殿停帶刀

康熙八年八月禮部覆准臺臣李疏稱文臣奏事無帶刀
進 殿之理應行停止等語除武職官員外大小文職官
員上 殿奏事俱應停止帶刀

坐褥定制

大清會典順治九年議准

親王冬用純貂皮夏用五爪紅龍緞

世子郡王各用捨狸獾鑲貂皮夏用四爪藍蟒緞

貝勒冬用捨狸獾皮夏用藍粧緞

貝子冬用白豹皮夏用藍緞鑲粧緞以上俱襯紅白氈紅

上白下

鎮國公冬用紅豹皮夏用紅閃緞

輔國公冬用裁去頭尾紅豹皮夏用素閃緞

鎮國將軍冬用狼皮夏用紅褐鑲青褐

輔國將軍冬用獾皮夏用青布鑲紅布

奉國將軍冬用貉皮夏用青布以上俱襯紅氈

奉恩將軍冬用野山羊皮夏用藍布襯白氈

固倫額駙冬用白豹皮夏用藍緞鑲粧緞

和碩公主額駙冬用裁去頭尾紅豹皮夏用青閃緞

民公冬用虎皮夏用青閃緞

侯郡主額駙冬用裁去頭尾虎皮夏用藍緞

伯冬用裁去頭尾虎皮夏用紅褐

一品官冬用狼皮夏用紅褐鑲青褐

二品官冬用獾皮夏用青布鑲紅布

三品官冬用貉皮夏用青布以上俱襯紅氈

四品官冬用野山羊皮夏用藍布俱襯白氈

五品官以下冬用鹿皮襯白氈夏止用白氈

加級不許過品

康熙四十九年二月禮部題定內外文武七品八品九品官員或議叙給級或捐納加級者不准過四品三品四品官員或加級者不准過二品二品官員或加級者不准過一品查一品大臣頂子上嵌東珠一顆坐狼皮坐褥二品大臣頂子上嵌紅眼睛坐獾子皮坐褥都統等一品大臣仍照定例頂子上嵌東珠一顆坐狼皮坐褥外雖有加級頂子上不准嵌東珠二顆坐虎皮坐褥大學士尚書雖係二品大臣職分亦大若有加級俱照一品大臣例頂子上嵌東珠一顆坐狼皮坐褥此外文武一品官員雖有加級

頂子上不准嵌東珠仍嵌紅眼睛坐獾子皮坐褥

坐車定制

康熙三十二年四月禮部題定查公主王等格格以下大臣官員及民人妻所坐車頂幃走水分別次序雖有定例或有不遵定制僭用是以宗室與民難分次序今應分明定制不得過分酌量更定

固龍公主所坐車轎頂走水用金黃色頂幃紅色頂四角青鑲

和碩公主所坐轎車走水用金黃色頂幃紅色四角藍鑲

和碩親王嫡妃所坐轎車頂幃紅色走水頂四角青鑲

和碩親王側妃所坐轎車頂幃紅色走水青色頂四角青

鑲

世子嫡妃所坐轎車頂幃走水俱與親王側妃同

世子側妃所坐轎車頂幃紅色走水藍色頂四角藍鑲

多羅郡王嫡妃所坐轎車頂幃走水俱與世子側妃同

多羅郡王側妃所坐轎車頂幃青色走水紅色頂四角紅

鑲

長子嫡妃多羅貝勒嫡夫人所坐轎車頂幃走水俱與多

羅郡王側妃同

長子側妃多羅貝勒側夫人所坐轎車頂青色幃藍色走

水紅色頂四角紅鑲

固山貝子嫡夫人所坐車頂幃走水俱與長子側妃多羅

貝勒夫人同

固山貝子側夫人所坐車頂幃用藍走水紅色以上車轆

輪用紫色

鎮國公嫡夫人所坐車頂幃走水俱與貝子側夫人同

鎮國公側夫人所坐車頂幃用藍色走水青鑲

輔國公嫡夫人所坐車頂幃走水俱與鎮國公側夫人同

輔國公側夫人所坐車頂幃藍色走水紅色車轆用紫色

輪紅色頂幃走水用緞

鎮國將軍妻所坐車走水綠色頂幃青色頂四角綠鑲

輔國將軍妻所坐車頂幃青色走水綠色

奉國將軍妻所坐車頂幃走水俱用青色以上俱用無花

素緞銀頂車轅用青色輪用紅色前後車頂銀嵌

奉恩將軍再閑散宗室妻所坐車頂幃走水俱用青屯絹

車轅青色輪紅色銀頂車轅前後頂用銀嵌

郡主以下入八分公女卿君以上所坐車頂幃走水轅輪

俱與本庶母同

再未授封格格等所坐車頂幃走水俱照伊夫品級用轅

青色輪紅色

民三等公妻所坐車頂走水用綠色幃青色頂四角青鑲

侯伯妻所坐車頂走水綠色幃青色四角藍鑲

內大臣都統大學士尚書左都御史精奇尼哈番妻所坐

車頂幃青色走水綠色頂四角綠鑲

閑秩大臣前鋒統領護軍統領包衣昂邦副都統步軍統

領侍郎阿思尼哈番妻所坐車頂幃用青色走水綠色以

上俱用素緞銀頂車轅前後頂子銀嵌

學士副都御史通政使大理寺正卿詹事府正詹一等待

衛叅領步軍總尉王府長史妻所坐車頂幃素青緞走水

花青緞銀頂車轅頂子銀嵌

阿達哈哈番太常寺太僕寺光祿寺正卿國子監祭酒通

政司左右通政大理寺少卿督捕理事官內閣侍讀學士

翰林院侍讀學士侍講學士詹事府少詹庶子妻所坐車

頂幃走水俱用無花青緞銀頂車轅前後頂銀嵌

二等侍衛佐領上三旂包衣大貝勒司儀長拜他喇布勒

哈番步軍付尉翰林院侍讀侍講詹事府諭德洗馬鴻臚寺正卿國子監司業郎中給事中監察御史太常太僕寺少卿妻所坐車頂幃走水俱用青屯絹車轅前後損銅嵌三等侍衛欽天監監正內閣正事光祿鴻臚寺少卿通政司叅議詹事府中允員外郎妻所坐車頂幃走水俱用無花青紡絲錫頂車轅前後損子銅嵌

拖沙喇哈番主事等官妻以下有頂帶官員妻以上所坐車頂幃走水俱用青布錫頂車轅前後損子銅嵌庶民所坐車頂幃走水俱用藍布錫頂

民公侯伯妻以下有頂帶官員妻以上所坐車轅輪俱用青色大臣官員俱照依官職用加級不准若違此定例僭用者該都統副都統叅領佐領查拏該部治罪該管大臣官員不行嚴查被該部查出傍人出首將該管大臣官員以至小撥什庫俱交該部查議治罪奉

旨依議宗室以至民人將所定之處着侍衛內大臣大學士尚書公同察看不許又有人條陳

戴翎定式

大清會典 國初定貝子戴三眼孔雀翎根綴藍翎鎮國公輔國公戴二眼孔雀翎根綴藍翎護軍統領護軍叅領戴一眼孔雀翎根綴藍翎護軍校戴染藍雕

順治十八年議准貝子公戴翎俱照舊例內大臣一等二等三等侍衛八內大臣額駙前鋒統領護軍統領前鋒叅

領護軍叅領諸王府長史一等侍衛戴一眼孔雀翎根綴藍翎貝勒府司儀長王府貝勒府二等三等護衛貝子公府護衛及護軍校俱戴染藍翎內外額駙俱不許戴諸王府散騎郎有阿達哈哈番以上世職許戴一眼孔雀翎根綴藍翎其餘雖加級不准戴

腰帶定式

大清會典凡繫帶親王以下宗室以上俱繫金黃帶覺羅繫紅帶其金黃帶紅帶不許給與異姓人員若 欽賜者許

繫

扯手顏色

康熙二十五年正月禮部題定嗣後和碩親王世子多羅

郡王等准用金黃扯手內外官員不准用長子貝勒貝子許用紫扯手至于從前給過內外官員及微末之輩紫扯手槩行禁止不准用如有違此定例將給者用者令該府

部題叅

在外文武官員執事

總督杏黃傘二把金黃棍一對旗八桿扇二柄兵拳一對雁翎刀一對飛虎旗一對獸劔一對桐棍一對槩棍一對鎗二對迴避牌一對肅靜牌一對共十七對
巡撫杏黃傘二把金黃棍一對旗八桿扇二柄獸劔一對桐棍一對槩棍一對鎗一對迴避牌一對肅靜牌一對共

十三對

布政司按察司杏黃傘二把金黃棍一對旗六桿扇二柄
槩棍一對迴避牌一對肅靜牌一對共九對

各道掌印都司知府杏黃傘一把旗四桿扇一柄桐棍一
對槩棍一對迴避牌一對肅靜牌一對共七對

同知通判知州知縣藍傘一把扇一柄桐棍一對槩棍一
對迴避牌一對共四對

州同州判縣丞藍傘一把桐棍一對
典史雜職竹板一對

提督杏黃傘二把金黃棍一對旗八桿扇二柄兵拳一對
雁翎刀一對飛虎旗一對鎗二對獸劍一對刑杖一對迴

避牌一對肅靜牌一對共十六對

總兵杏黃傘二把金黃棍一對旗八桿扇二柄大刀一對
獸劍一對鎗一對迴避牌一對肅靜牌一對共十二對

副將杏黃傘二把金黃棍一對旗六桿扇二柄迴避牌一
對肅靜牌一對共八對

叅將遊擊都司杏黃傘一把扇一柄旗四桿桐棍一對迴
避牌一對肅靜牌一對共六對

守備杏黃傘一把桐棍一對旗四桿共四對總督巡撫提督
總兵官以下各官乘轎鳴鑼提索竹板等俱照舊例

將軍副都統儀從

康熙三十三年六月禮部覆准川督佛 疏稱駐防西安

將軍統轄滿洲蒙古漢軍八旗官兵朝期會集閱操出入

必須整嚴外省督撫提鎮俱有儀從鼓手今駐防將軍似應酌量給與儀從等件以壯國威而均體統等因查定例內督撫提鎮以下文武各官俱有執事其駐防將軍副都統執事未經議及應如該督題請嗣後該將軍朝期會集閱操出入令其排列執事鼓手照總督例至副都統亦係鎮守地方防禦邊疆之責副都統執事照總兵官例其打執事等人役工食俱照督撫執事八役工食支給奉旨各省駐防將軍執事照提督例用餘依議

繫踢胸掛素珠

康熙三年五月禮部覆准廣東道李 條奏查康熙元年正月內為項掛數珠拴馬踢胸等因其奏奉

旨將掛數珠身穿好服并補服打執事俱着申飭行欽此查穿補服打執事有數珠掛戴并拴馬踢胸等項滿漢各官已經申飭在案無可再議奉

旨項掛數珠身穿好服補服打執事拴馬踢胸行走不遵行者俱爾部未行嚴加申飭之故殊屬不合今再着嚴行申飭其掛數珠著照穿蟒服定例四品以上官員許掛此下官員不許掛數珠

官員軍民服飾

康熙四年五月禮部題定查洪武時定例百姓許用紬絹紗布不許用錦緞綾羅商人許穿絹布不許穿紬紗官吏兵民不許用綵繡龍鳳至於順治九年定例公侯伯一品

二品三品四品等官凡五爪三爪蟒蘇緞圓補子黃色秋
香色緞黑色狐皮俱不許穿五品六品七品官蟒緞粧緞
貂皮狍獬狝俱不許穿八品九品官貂皮狍獬狝白貂皮
蟒緞粧緞金花緞倭緞各花緞擺牙喇蟒緞狐欣緞靴俱
不許穿小撥什庫書辦外郎通事耆老兵民商人等凡蟒
緞粧緞金花緞倭緞各色花緞綵繡等物及貂皮狍獬狝
狐欣貂皮緞靴併鑲綠皮牙縫靴俱不許穿不許鑲領袖
不許用金鍍腰刀鞍轡不許用紅鞋踢胸僧道衣服止許
用紬絹紡絲素紗棉布夏布餘不許穿官民家下奴僕戲
子皂隸凡貂帽衣素併藍素緞綾等紬狼皮俱不許穿戴
狐皮沙狐皮狍子皮皮帽許戴樂戶水戶俱戴本色黃臊

鼠皮帽涼帽用綠絹邊裏其
緞綾等紬不許穿妓女
凡衣素併藍素緞綾等紬不許穿飾環釧等項不許用
金在案至康熙元年定例四品以上官員穿蟒蘇緞五品
以下官員穿貂皮狍獬狝軍民人等除蟒緞粧緞金花緞
貂皮外其餘各項皮臊緞子貂鼠帽許穿戴在案今康熙
四年二月內奉

上諭看得內外文武官員軍民商人奴僕俱穿好緞疋輕裘前
著人引路行走不遵所定次序任意妄費穿用官民貴賤
不別不合崇節儉重體統之盛典嗣後官民人等穿用之
物應照順治九年定例再行曉諭京城內應打執事行走
大臣及朝內閒散內大臣閒散學士正三品以上大九品

官員俱著用人頂馬引路餘官不許六品以上官員仍著打踢胸行走七品以下官員及軍民人等在京城內不許打踢胸文武三品以上官員鞍轡上不許用綠松石珊瑚寶石七品以下官員及軍民人等凡鞍轡腰刀帶撒袋等物不許用綠松石珊瑚寶石等因奉

旨三品以上官員刀帶撒袋等物准用綠松石珊瑚寶石四品以上官員准用踢胸其出兵處所官兵用踢胸各從其便餘依議向來定例未盡遵行皆爾部未經嚴飭之故以後著照此定例遵行嚴加申飭如有違者稽察處治

禁止服色違制

康熙九年二月禮部等題准凡民公侯伯以下有頂帶官

員以上凡五爪王爪蟒緞翠緞圓補服黑狐皮黃色秋香色等緞不許穿用外其軍民人等以下除蟒緞粧緞金花緞貂皮捨猓獬白豹皮袖子不許穿用外其餘各樣緞疋皮燥聽其隨便穿用其貂皮止許做帽圍領

滿漢官民服色定例

康熙十一年八月禮部題奉

上諭禮部帝王致治首在維持風化辨別等威崇尚節儉禁止奢侈故能使人心淳樸治化休隆近見官員軍民人等服用奢靡僭越無度富者趨尚華麗貧者互相效尤以致窘乏爲非盜竊詐僞由此而起人心囂凌風俗頹壞其於治化所關匪細今應作何分別務行禁止着九卿科道會同嚴加確議

定例具奏特諭欽此議得官民穿用若奢侈越分不肖者廢
產過費所用不足以致紊亂相應將順治九年定例一併
酌定凡五爪三爪滿翠緞圓補子黃色秋香色黑狐皮外
民公侯伯以下未入八分閒散宗室四品官三等侍衛以
上貂皮猓猓猓緞粧緞金花緞各樣補緞倭緞俱准用
無品級閒散覺羅五品六品七品官金花緞倭緞各樣緞
疋俱准用除蟒緞粧緞貂皮猓猓猓外其各樣皮臊俱准
用貂皮止許作帽圍領八品九品官除蟒緞粧緞貂皮猓
猓猓白豹皮外其各樣皮臊緞疋俱准用貂皮止許作帽
圍領五品官以下九品官以上朝衣及衣服等物許用蟒
緞粧緞倭緞鑲沿并鑲領公侯伯一品官以下滿漢有頂

帶官員以上其妻服色等物俱照夫其未分家子未出嫁
女服色俱照父品級穿用已分家子照本身穿用已出嫁
女照其夫穿用官員父母俱照子職品級穿用 御前使
從無職閒人緞疋皮臊隨便穿用其舉人官生貢生監生
生員除貂皮猓猓猓白豹皮蟒緞粧緞金花緞外一應緞
疋皮臊許穿用貂皮止許作帽圍領擺呀喇撥什庫無品
筆帖式許穿紬綾紡絲絹屯絹葛布夏布毛青三梭等物
狼皮狐皮貉皮沙狐羊皮等皮軍民及辦事人并書辦外
郎家僕許穿紡絲絹綿紬繭細褙子屯絹葛布毛青三梭
布夏布狼皮狐皮貉皮沙狐羊皮等皮擺呀喇及民凡一
應器械不許用金煖帽涼帽止許圓月用片金其妻亦隨

夫凡各物件不許用金珠擺呀喇撥什庫無品筆帖式及庶民煖帽圍領不許用貂皮並不許穿狐吹沙狐吹及一應緞疋紗羅緞靴靴上不許鑲綠斜皮帽止許用染黃鼠皮及狐皮貉皮沙狐皮許作帽戴其緣事革職等人除貂皮捨猢猻蟒緞粧緞金花緞不許穿用外原係出仕之人相應許穿各樣緞疋皮臊僧道照常穿用袈裟法衣外其別項俱與民同民公侯伯一品官以上四品官三等待衛以上刀帶撒袋等物許用綠松珊瑚寶石等物其鞍轡不許用五品官以下至有頂帶官員刀帶撒袋等物不許用綠松珊瑚寶石等物民公侯伯以下至庶民亡故皮臊衣服俱照本身若要隨身焚化許其隨身焚化後上墳不許焚化違此定例越分過用者俱係該管官不行嚴查怠玩之故今將入旗官兵開散人交與各該都統副都統叅領佐領驍騎校小撥什庫直隸各省交與督撫府州縣提鎮副叅遊守等官嚴禁違此定例越分穿用該管官查出將越分穿用之人若係官交與該部革職係旗下之人交與該部枷號一個月不准折贖責四十板將越分穿用之物入官如有越分穿用之人該管官不行查出被傍人捉拿到衙門審實將越分之物給與所拿之人將佐領驍騎校每事罰俸三個月將小撥什庫不准折贖鞭責五十如本叅領內越分穿用之事犯二次將叅領罰俸三個月都統副都統本旗內犯三次罰俸三個月其官員軍民家下奴

刑部員外 卷下 五
僕有越分穿用其主若官交與該部罰俸三個月如閒人
鞭責五十民責二十板越分穿用之人係旗下之人枷號
一個月不准折贖鞭責一百若民枷號一個月責四十板
其五城屬民將該司坊官每事罰俸三個月總甲不准折
贖責二十板越分穿用之人犯二次將該城滿漢監察御
史罰俸三個月巡捕管兵越分穿用將所管把總每事罰
俸三個月犯二次將叅將遊擊罰俸三個月內府佐領人
役越分穿用佐領家長亦照外佐領驍騎校例治罪小撥
什庫亦不准折贖鞭責五十直隸各省軍民越分穿用該
督撫提鎮照都統副都統例治罪司道副將叅將照叅領
治罪府州縣官并遊守等官照佐領驍騎校例治罪俟

命下之日曉諭以文到爲始一月外舊衣服亦不許穿用如將
人在家越分等物首告并在家拿獲者不准行相應刊刻
通行入旂及內府佐領并直隸各省王公將軍遵行奉

旨這本內所議幾處似屬稍過着再議具奏欽此再議得擺呀
喇撥什庫無品筆帖式等許穿平常青衣素紬綾紡絲絹
屯絹葛布夏布毛青三梭狼皮狐皮貉皮沙狐皮羊皮等
皮其妻亦照夫穿便者止許用金鉗軍民外郎書辦及辦
事人許穿紬綾紡絲絹繭紬綿紬褙子屯絹葛布夏布毛
青三梭狼皮狐皮貉皮沙狐皮羊皮其妻亦照夫穿便者
止許用金鉗擺呀喇以下以至軍民便者許戴貂鼠帽及
圍領家僕皂隸戲子等役許穿紡絲絹綿紬繭紬褙子屯

絹葛布夏布毛青三梭狼皮狐皮貉皮沙狐皮羊皮等物
貂鼠不許作帽圍領染黃臊鼠皮狐皮貉皮獺皮許作帽
戴樂戶水戶俱戴本色黃臊鼠皮帽涼帽用綠絹裏沿邊
許穿絹杭紬綿紬毛青三梭葛布夏布羊皮其餘一應緞
疋皮臊俱不許穿用其餘俱照前議奉

旨軍民外郎書辦人等煖帽圍領不許用貂皮擺呀喇撥什庫
無品筆帖式并軍民外郎書辦及辦事人等之妻不許用金
鉗餘俱依議

再議滿漢官民服色

康熙十二年 月禮部覆准左都御史多 疏稱五品以
下官員暨撥什庫擺呀喇貂皮止許做帽與圍領而袖口

與皮袖鑲襟貂皮貂尾應否准用未經議及又如五品以
下官員不准用綠松石珊瑚等物其妻項圈墜子應否准
鑲未經議及又如軍民止許穿紬與紡絲而絲綿帶應否
准用未經議及又如綠斜皮止禁靴上不禁夾牙縫而撒
袋上皮鞍座應否准用未經議及等語今五品以下官員
袖口皮袖鑲襟准用貂皮貂尾其妻風領亦准用項圈墜
子簪子亦准鑲用綠松珊瑚等物其無品筆帖式擺呀喇
撥什庫皮袖鑲襟貂皮貂尾其妻風領亦准用貂皮軍民
以下絲棉帶准用撒袋鞍座腰刀准用綠斜皮又查官員
之父或當擺呀喇撥什庫兵辦事人者或照子穿用或照
本身穿用官員之子雖當擺呀喇撥什庫兵辦事人而未

分家者或照其父穿用或照本身穿用其亡故官員未分家之子照其父穿用之處亦未經申說明白今相應將官員之父有當擺呀喇撥什庫兵辦事人者准照其子品級穿用官員之子雖當擺呀喇撥什庫兵辦事人而未分家者准照其父品級穿用亡故官員之子未經任事之間准照其父品級穿用六十歲以上間散之人係年邁應照擺呀喇撥什庫穿用又查先所議之處未經議及銀鼠皮今銀鼠皮無頂帶筆帖式擺呀喇撥什庫以至兵民不准穿用其未經禁止緞子帽面狐欣圍領襪項等物俱准用俟命下之日通行入旗並直隸各省奉旨據奏官員之子雖當擺呀喇撥什庫兵辦事人而未分家者

准照父品穿用未合既以本身職役行走乃照父品穿用未合又稱雜項等物准用係何項等物未說明白着一併再議具奏欽此再議得官員之子有當擺呀喇撥什庫兵辦事人雖未分家者不准照其父品級穿用仍照本身穿用其灰鼠皮無品筆帖式以至軍民許穿用狐欣沙狐欣灰鼠皮圍領緞子煖面圍領面荷包面絲線靴瓣子此等雜項之物原無禁止相應一槩准用其餘俱照前議

停止服飾禁約

康熙十三年十二月奉

上諭禮部古帝王撫御天下莫不以禮制爲先務然釐定章程以資適中方可昭垂永久前見風俗近奢恐漸流於僭濫故

令更定條例一切服飾力崇儉樸異返淳龐詎意有司奉行過當專事苛細借端紛擾以致商賈壅滯物力匱絀小民深爲未便嗣後着仍照康熙九年定例遵行見今一切禁約停止爾部卽遵諭行特諭

禁止服飾奢僭

康熙二十四年正月禮部覆准左都陳 條奏嗣後除近御之人仍照常不議外議得貂皮狝獠獠蟒緞裝緞若混行穿用卽開奢侈之風以致大小無辨康熙十六年曾定一品官以下九品官以上坐次今在五班所坐官員以上各樣蟒緞粧緞貂皮狝獠獠等物應許隨身穿用其以上官員既准穿貂皮狝獠獠蟒緞粧緞亦應准掛素珠馬繫踢胸

其以下官員不許穿用俱遵照康熙十三年奉

上諭准照康熙九年所定之例遵行至婚喪之處應照順治九年所定遵行如違禁越穿者俱照康熙十一年處分違禁服飾之例治罪

再禁服飾違制

康熙二十六年 月禮部題定黃色秋香色五爪龍緞立龍緞團補服原經禁止官民不許穿用應將無金四爪之四團八團補服緞紗及無金照品級織造補服官民不許穿用其桃鶴等花團補服緞紗許照常穿用除秋香色原行禁止外似秋香色之香色米色亦應不許穿用其大臣官員有

御賜衣服許其穿用若賞給五爪龍緞立龍緞俱令挑去一爪
穿用

御賜緞疋無論色樣許其穿用其官民家下奴僕皂隸等役若
與護軍兵丁一體穿用殊屬過分今官民家下奴僕皂隸
等役應許穿用紬綾紡絲等項至官民服飾筵席祭葬等
項各照品級定制者原爲分別尊卑誠恐富者用華麗而
貧者借貸慕倣以致窮乏明知定例甚詳而互相倣效濫
用者甚多此皆因管查之人徇情怠玩所致嗣後凡有筵
席祭葬之事許各該佐領專差驍騎校小撥什庫同族長
巡視務令遵照定制如有違禁奢靡濫用者卽拿送部治
罪若巡視之驍騎校小撥什庫族長不行查拿及濫用之
人一體治罪其該管官員不行嚴拿或被傍人拿獲將該
佐領驍騎校小撥什庫以上在外督撫以下至州縣官處
分之例已於康熙十一年題定今應再行嚴飭令該管官
員務以實心奉行禁止奢靡仰副

皇上正人心厚風俗之至意如不遵行事發仍照康熙十一年
定例議處

再行嚴禁服制各款

康熙三十九年十二月禮部覆准會議得先經給事中穆
條奏兵民服色吉凶一疏臣等再行確查歷年禁例將官
兵民人衣服吉凶應行禁止之處遵奉

御批酌量增減

禮部

服制

七

一定例凡五爪蟒緞粧緞滿翠緞立龍緞圓補子黃色秋香色黑色狐皮並無金之四爪四團入團補服紗緞無金照品級織造補服及小秋香之香色米色官民俱不許穿用其大臣官員有

御賜五爪衣服許其穿用外賞給五爪龍緞立龍緞俱令挑去一爪穿用

御賜緞疋無論色樣許其穿用其御前使從無職閒人一應緞疋皮臊俱准隨便穿用今應仍照此例

一定例民公侯伯以下未入八分閒散宗室四品武官三等侍衛以上貂皮猞猁蟒緞粧緞等一應緞疋皮臊俱准穿用等語今應照此例其藍翎侍衛亦照此例穿用

一定例無品閒散覺羅五六七品官不許穿蟒緞粧緞貂皮猞猁其餘緞疋皮臊俱准穿用貂皮止許作帽圍領等語今大花樣緞紗天馬皮銀鼠亦應不許穿用

一定例五品官以下九品官以上官員朝衣衣服許用蟒緞粧緞倭緞鑲沿并鑲領等語今此等官員朝衣蟒袍係禮儀之物俱准穿用

一定例蒙古漢軍官員往口外寒冷之地出差貂皮狼皮猞猁獾皮照常穿用漢官不往口外行走四品職掌以下槩不准穿用等語今漢官京堂以上翰林科道滿洲鳴贊亦准其穿用

一定例和碩親王隨身使從無職閒人除頂帶補子外照

五品官等第穿用世子多羅郡王隨身使從無職閑人除頂帶補子外照六品官等第穿用等語今多羅貝勒隨身使從無職閑人除頂帶補子外照七品官等第穿用固山貝子入八分公隨身使從無職閑人除頂帶補子外照八品官等第穿用

一定例一等二等三等侍衛甲喇章京理事官許穿貂皮鑲披領袍無責任蘇喇阿達哈哈番牛錄章京拜他喇布勒哈番不許穿貂鼠鑲披領袍如

上賜許穿等語今各王貝勒等賞給官員鑲披領許其穿用王貝勒等賞給物件亦准穿用

一定例有品筆帖式舉人官生貢生監生生員等不許穿

蟒緞粗緞貂皮捨猢猻白豹皮外其餘緞疋皮臊俱准穿用貂皮止許作帽圍領

一無品筆帖式烏林人護軍撥什庫等不許穿狐欣沙狐欣緞紗羅止許穿青衣素紬綾紡絲絹屯絹葛布夏布毛青三梭等物狼皮狐皮貂皮沙狐皮羊皮等皮臊貂皮止許作帽圍領等語今有品無品筆帖式烏林人旗下舉人官生貢生監生生員護軍撥什庫等大花樣緞紗天馬銀鼠不許穿用止許穿平時緞紗紬綾絹屯絹葛布夏布各樣布疋貂皮沙狐皮灰鼠皮狼皮狐皮羊皮帽圍領許用貂皮其妻俱照伊夫穿用止許用金鉗其漢舉人官貢監生員除狼皮外亦照此例

永音貝例
一定例軍民外郎書辦不許穿狐欣沙狐欣一應緞疋及
緞靴止許穿紬綾紡絲絹屯絹繭紬綿紬褐子葛布夏布
各樣布狼皮狐皮貂皮沙狐皮羊皮等皮帽不許用貂皮
止許用染黃鼠皮貂皮狐皮沙狐皮等語今狼皮狐皮亦
不許穿用

一定例緣事革職人員原係出仕之人除貂皮捨猓獾蟒
緞粧緞不許穿用外其餘各樣緞疋皮燥俱准穿用帽領
許用貂皮等語今有 誥命者照伊品級穿無追 誥者
仍照此例

一定例民公侯伯一品官以下四品職掌官三等侍衛以
上腰帶撒袋等物許用綠松珊瑚寶石等物其鞍轡不許
用五品以下至有頂帶官員以上腰帶撒袋等物俱不許
用綠松寶石等語今應照此例又鞍座韉三品有職掌阿
達哈哈番官員以上許用虎豹狼皮狐皮今應仍照此例
其頂馬占事阿思尼哈番以上許用

一原議得無品筆帖式烏林人舉人官生貢生監生生員
護軍撥什庫以至兵民鞍韉鞍座不許用倭緞搭線鑲沿
鞍座韉紅托裏其秋轡不許用鍍金等語其官兵盔甲撒
袋腰刀俱係壯軍威之物不在禁限今應仍照此例

一定例公侯伯一品官以下有頂帶官員以上其父母服
色俱照伊子穿用其妻服色從夫未分家子未出嫁女服
色從父已分家子照本身穿用已出嫁女照其夫穿用等

元音具例
語今仍照此例

一定例家僕皂隸戲子歌童不許用各色緞紗綾羅狐
沙狐肱及緞靴止許穿紡絲絹綿紬繭紬襖子屯絹葛布
夏布各樣布疋狼皮狐皮貉皮沙狐皮羊皮帽領不許用
貂皮止許用染黃鼠皮狐皮貉皮獺皮等語今狼皮狐皮
亦不許穿用

一定例僧道止許用紬絹紡絲葛布綿布不許用緞紗綾
羅惟袈裟道服不在禁限今應仍照此例

一定例樂戶水戶俱帶本色黃臊皮帽涼帽用綠絹裏沿
邊止許穿絹杭紬葛布夏布各樣布疋粗羊皮其餘一應
緞疋紗皮燥俱不許穿用等語今應仍照此例

一定例公侯伯娶妻並未分家子娶妻俱送緞衣五套緞
被褥子三床金項圈一個金簪三枝金墜子初定例公用
羊九隻燒黃酒二十五瓶侯用羊八隻燒黃酒二十三瓶
伯用羊七隻燒黃酒二十一瓶成婚禮公用羊十四隻桌
子二十張燒黃酒三十瓶侯用羊十三隻桌子十八張燒
黃酒二十七瓶伯用羊十二隻桌子十七張燒黃酒二十
六瓶等語今應仍照此例

一定例一品官娶妻並未分家子娶媳婦送緞衣四套緞
被褥三床金項圈一個金簪三枝金墜子初定禮羊六隻
燒黃酒二十瓶成婚禮羊十隻桌子十五張燒黃酒二十
五瓶等語今應仍照此例

一定例二三品官員娶妻並未分家子娶妻俱送緞衣三套被褥二床金項圈一個金墜子其二品官金簪三枝三品官金簪二枝初定禮二品官用羊四隻燒黃酒十五瓶三品官用羊三隻燒黃酒十瓶成婚禮二品官用羊八隻桌子十張燒黃酒二十瓶三品官用羊六隻桌子八張燒黃酒十五瓶等語今應仍照此例

一定例無品級宗室閑散覺羅四品官以下有頂帶官員以上娶妻並未分家子娶媳婦俱送緞衣二套緞被褥二床金項圈一個金墜子初定禮宗室覺羅四品官五品官俱用羊二隻燒黃酒八瓶六品官以下用羊二隻燒黃酒五瓶成婚禮宗室及四品官用羊五隻燒黃酒十二瓶覺羅及五品官用羊四隻桌子五張燒黃酒十瓶六品官以下用羊三隻燒黃酒八瓶等語今應仍照此例

一定例兵民娶媳婦送衣服一套被褥一床初定禮羊一隻燒酒三瓶成婚禮羊二隻燒黃酒五瓶以上凡猪入羊數鵝鴨雞隨使用俱不許還禮等語以上應照此例今有品無品筆帖式俊秀烏林人護軍撥什庫以致兵民婚娶不許用桌張凡兵民婚娶止許照例行初定禮成婚禮不許用插帶等禮其迎娶轎上不許用綉綵樓亭其漢人婚娶亦照定例止行初定禮成婚禮四品官員以上綉緞不得過八疋金銀首飾不得過八件桌子食盒不得過十件五品官以上綉緞不得過六疋金銀首飾不得過六件桌

子食盒不得過八件八品以下至有頂帶人員以上紬緞不得過四疋金銀首飾不得過四件桌子食盒不得過六件無職人員及兵民紬緞不得過四疋菓盒不得過四件其金銀財禮官民俱不許用至漢人婦女除娶婦嫁女外不許往來燕會其有僭用冠帔補服大轎者并行禁止違者罪坐夫男

一定例民公和碩額附亡故者用伊一應執事並鞍馬七匹初上墳鏢子八千紙錢八千張桌子八張羊四隻侯伯亡故者用伊一應執事並鞍馬六匹初上墳用鏢子七千紙錢七千張桌子七張羊四隻鎮國將軍及一品官亡故者用伊一應執事鞍馬五匹初上墳用鏢子六千紙錢六

千張桌子六張羊三隻輔國將軍及二品官亡故者用伊一應執事並鞍馬四疋初上墳用鏢子五千紙錢五千張羊三隻奉恩將軍及三品官亡故者用伊一應執事並鞍馬三匹初上墳用鏢子四千紙錢四千張羊二隻各宗室及四品官亡故者用伊一應執事並鞍馬二匹初上墳用鏢子三千紙錢三千張桌子三張羊二隻五品官以下有頂帶以上亡故者用伊一應執事並馬二匹初上墳用鏢子二千紙錢二千張桌子二張羊二隻兵民亡故者馬一匹初上墳用鏢子一千紙錢一千張羊一隻以上大上墳俱照初上墳例民公以下有頂帶官員以上父母妻及未分家子亡故者鏢子紙錢桌張羊隻各照伊等品級行並

鞍馬一匹周年百日及平常上墳用鏝子一千紙錢一千張桌子三張羊一隻兵民用鏝子五百紙錢五百張羊一隻凡官民人上墳不許懸掛鏝子紙錢止許在床架堆積欲爲紙帛焚化者將定數紙錢減去入在數內焚化其燒黃酒套環麪食各隨便量用王以下兵民清明節製紙標插求行禁止止許剪紙錢標插墳墓等語以上俱仍照定例行再貝子公侯伯以下至民上墳不許焚化皮臊衣服求行禁止再官民亡故後送骨殖者有職人員擡扛人夫不許過四十八人無職人及兵民抬扛人夫不許過二十四人不許用戲子秧歌襍耍求行禁止凡爲喪家送飯者不許宰殺牲口及過用葷菜止許送稀粥其祭奠軸帳不許用緞疋再漢軍民人治喪送帛止許用細絹布疋不得過二疋不許設席款客及用鼓樂并不許多用紙扎其名旌不得過九尺吊奠止許用香茶燭酒菓其餘祭物俱不許用凡違禁衣服等物在內以出示之日爲始在外以文到之日爲始俱限兩個月更換限外犯者照例治罪

禁穿貂皮狴狽

康熙三十三年 月禮部覆准御史任 條奏查康熙二十六年定例照舊遵行外至貂皮狴狽狼皮乃寒冷需用之物滿洲蒙古漢軍官員差往口外極寒之地行走貂皮狴狽狼皮應許照常穿用其漢官不於口外差往行走應於三品以上職掌官員仍許穿用貂皮狴狽狼皮

四品以下職掌官員不許穿用其貂皮止許做煖帽圍領用南方地煖貂皮狍猓獾皮無所需用相應嚴禁販賣如有違禁穿用販賣嚴行處分

卑官及民迴避頂馬官員

康熙十八年五月禮部題定竊惟官品原有尊卑體統尤宜隆重國家嚴定制虔務使臣民遵行不容一日褻越查得臣部先經通行在京城內武職民公侯伯以下散秩大臣阿思哈尼哈番以上文職大學士尚書以下舉人進士大九卿以上應照先通行各頂馬一人前引凡係官卑者及民若路遇大臣各照品級下馬迴避等因在案但通行年久至有不遵定例不下馬擅闖行走亦未可知相應再

行嚴禁嗣後有此等人員如違禁例者許被闖大臣官員卽行拿送該部議處其不應著頂馬前引官員及民如有着頂馬前引者或被臣部官員查獲或被科道官員指叅係官交與該部議處係民交與刑部處治又查得無賴之徒并孩童路遇滿漢大臣官員騎馬坐轎行走無端侮辱殊屬違法更有等無賴之徒闖婦女坐轎窺視尤爲無禮之極嗣後若遇違法惡輩許大臣官員及跟隨大臣官員妻人役當卽拿送該部處治其年未滿歲孩童有父將伊父無父將伊兄伯叔內以至親一人議處此等違禁者在內俱因佐領驍騎校小撥什庫在外因五城御史兵馬司官不行嚴禁步軍校不行查拿之故如有此等事發將該

管官員及分汛地方步軍校亦令該部議處若奴僕之子
既有家主將伊家主一併議處其佐領驍騎校小撥什庫
免議俟

命下之日臣部將先經通行之處一併通行入旂五城步軍提
督嚴禁一體遵行

鄉耆改錫頂

康熙二十一年十二月禮部題定查耆老帽頂例用牛角
今因以畜角表冠儀瞻不雅嗣後更以錫鐵

太醫院服色

康熙四十年正月禮部太醫院綠頭牌啓奏臣等一應服
色皮燥鞍鞞等項得邀恩悉照

御前使從照常穿用之例外醫士人等照舉監生員穿用等因
奉

旨依議大夫們一概用罷欽此行令直省凡遇本院衙門官員
士生照例穿用如無本院衙門印信執照卽係假冒以便
查請

四譯 第十一

朝貢通例

大清會典凡外國朝貢以表文方物爲憑該督撫查照的實方准具題入貢

凡進貢員役每次不得過百入京員役止許二十人餘皆留邊聽賞其進貢船不得過三隻每船不得過百人

凡外國人送該撫禮物未行禁止

凡外國船隻非係進貢之年無故私來貿易該督撫卽行阻逐

凡外國進貢除定例船隻外其接貢探貢等船一概阻回不許放入

凡貢船未到護貢及探貢等船不准交易

凡外國貢使或在途病故禮部具題令內院撰祭文所在布政司備祭品遣堂官致祭一次仍置地塋立石封識若同來使臣自願帶回骸骨者聽若到京病故給棺木紅緞遣祠祭官

諭祭兵部應付車輛人夫其應賞衣服緞疋等物仍付同使臣領回頒給若進貢從人在京病故者給棺木紅緞在途病故者聽其自行埋葬

凡貢使歸國例差司賓序班一員給勘合由驛遞伴送沿途防護促行不許停留騷擾及交易違禁貨物交明該撫卽還該督撫照例送出邊境

康熙三年定凡外國慕化來貢方物照其所進查收不拘舊例五年題准凡外國奏疏不得交付遣往使臣帶來令衙差官交該督撫轉奏六年定凡外國投文到該督撫該督撫卽開閱原文議題

凡外國進貢正副使及定額從人來京沿途口糧驛遞夫馬舟車該督撫照例給發差官伴送及兵丁護送到京其貢使回國沿途口糧驛遞夫船兵部給與勘合其留邊人役該地方官照例給與食物嚴加防守候貢使回國時同送出境

朝鮮國卽高麗國於諸番中効順最先有年貢有節貢歲以爲常貢道由鳳凰城

土魯番在陝西西北順治三年進貢十三年定貢期五年
一次貢道由陝西甘肅入貢人役不得過一百名內留邊
七十名赴京三十名有多帶者督撫令守邊道將禁止發
回貢使領賞後許軍民人等入館交易赴京頭目每日給
行糧銀一錢從人每名日支銀五分留住甘肅者每名支
銀二分貢使回國差官伴送出邊二十年哈密土魯番並
五地藝目進小貢先進番本西馬照例赴京後止進玉石
金剛鑽

琉球國在東南海中本有中山王山南王山北王後惟中
山王世稱尚氏順治六年請貢八年進貢定貢期二年一
次貢道由福建閩縣進貢人數不得過一百五十人許正

副使二員從人十五名入京餘俱留邊聽賞

荷蘭國在東南海中順治十年請貢十三年進貢貢期初
定八年一次後改五年一次貢道由廣東今改由福建該
督撫選差官員兵丁護送來京到京人數不得過二十名
仍令督撫擇諳曉荷蘭語音三四人皆來

安南國古交趾地順治十八年請貢康熙二年進貢貢期
初定三年一次後改六年二次貢道由廣西憑祥州
暹羅國本海南暹與羅斛二國後并爲一順治十年請貢
康熙三年進貢貢期三年一次貢道由廣東

西洋國在西南海中康熙六年進貢因其地遠貢期未定
貢道由廣東今其人有留居舉門者

烏思藏卽土番地順治五年闡化王入貢定貢期三年一次貢道由陝西十七年大寶法王灌頂國師圓通州濟國師從雲南進貢每次以百人進貢准十五人到京其餘留邊著爲定例其回時禮部差通事送至河州衛交該撫護送出境

洮岷番寺洮州岷州有番僧有番族順治十七年圓覺寺進貢康熙二年番僧二十一寺換給勅書五年又給五寺勅書共二十六寺分爲四族定貢期三年一次貢道由甘肅

河州番寺順治八年河州弘化寺顯慶寺莊浪感恩寺進貢十年莊浪報恩寺端嚴寺進貢貢道俱由陝西

西寧番寺順治十年西定瞿曇等九寺進貢又西納演教寺進貢貢道俱由陝西

貢使偷帶違禁貨物

康熙九年閏二月禮部題議得朝鮮國進貢來的閔鼎重夥人回往伊國去被鳳凰城搜關時搜出通鑑十三套一百零六本問稱名叫梁廷燦除將此人交與正使閔鼎重帶去將搜出通鑑呈送等語查會典開載凡外國朝貢來京禁緝不許收買史書黑黃紫皂大花西番蓮緞疋焰硝牛角兵器各項器皿等物又查先年朝鮮國人進貢來京盜買焰硝帶去被鳳凰城駐扎章京搜出呈送前來臣部具題遣官前去全朝鮮國王會審今歲進貢來京閔鼎重

夥人梁廷燦將通鑑私買帶去有違定例爲此或應遣官
朝鮮國會同國王確審或

勅下朝鮮國王確審明白具題奉

旨着朝鮮國王確審明白議奏

外藩官役裁減給賞

康熙二十三年九月光祿寺衙門題定議得進貢哈而哈
厄魯特頭目及四十九旂太吉他布囊頭目隨公主王等
護衛伴人官員頭目等所給羊奶子酒肉鹽仍照舊例支
給凡各處賓客爲公事來的官員原先兼給羊肉一分牛
肉二分今裁給羊肉概給牛肉其新滿洲盛京并各處來
的官役戶刑二部入官人口所給鹽斤相應裁去五錢給

五錢照此例給散

解送海上漂失船隻

康熙二十三年四月禮部題定查海禁已開各省民人海
上貿易行者甚少應移文濱海等國王各飭該管地方凡
有船隻漂至者令收養解送查前此朝鮮國解送漂海人
口來者官給賞銀三十兩少通事賞銀八兩從人賞銀各
四兩于戶部移取賞銀禮部恩宴一次嗣後如有解到漂
失船隻人口照此例賞賜恩宴遣還其彼處收養漂失船
隻人口之人應令該國王獎勵賞賜

僧道

第十二

附太監

僧道科事例

僧錄司左善世由右善世補右善世由左闡教補左闡教
由右闡教補右闡教由左講經補左講經由右講經補右
講經由左覺義補左覺義由右覺義補右覺義以候缺僧
官補如無候缺官行僧錄司選取在京僧人送部本部出
題考試經典諳熟者或取十名或取二十名送吏部存案
候有缺出按名挨補

道錄司左正一由右正一補右正一由左演法補左演法
由右演法補右演法由左至靈補左至靈由右至靈補右
至靈由左至義補左至義由右至義補右至義以候缺道

官補如無候缺官行道錄司選取在京道士送部本部出題考試經典熟諳者或取十名或取二十名咨送吏部存案候有缺出按名挨補

直隸各省府設陰陽正術醫學正科僧綱司都綱道紀司都紀州設陰陽典術醫學典科僧正司僧正道正司道正縣設陰陽訓術醫學訓科僧會司道會司于康熙二年六月內題准俱免納銀兩止取該布政司府州縣學官里鄰甘結及年貌籍貫到部咨送吏部題補題補之後咨回本部出給劄付本司移付儀制司鑄給印信

直隸各省僧道尼姑度牒于順治十八年題准免其納銀如各該省僧道尼姑有納銀在先者將銀起解戶部仍行造冊咨送本部行查戶部如果銀兩解到本部填給滿漢字度牒用印鈐蓋咨送戶部填寫滿漢字用印鈐蓋仍咨回本部給發該地方官散給如不係納銀者該地方官咨送白棉榜紙并造冊送部止本部填寫滿漢字度牒用印給發

直隸各省僧道尼姑如有不領度牒私自簪剃及年過十六歲以上者俱責四十板還俗爲民僧道官知而不舉亦革職還俗

盛京設有僧錄司一員道錄司一員僧綱司八員如僧錄司名缺以僧綱司補僧綱司名缺以僧人補道錄司名缺以道士補俱係盛京禮部清字咨送本部番清轉咨吏部

題補咨回本部填給滿漢字劄付清字文咨送盛京禮部
給發僧道官

直隸各省不許創建寺廟于康熙元年七月內本部題准
如明季所蓋舊寺廟頽壞者僧道尼姑如欲修理呈報該
管僧道官轉報本部本部差官查驗如果係頽壞照舊修
理不許改建廣大如有私自修理及改造廣大者本部查
出將僧道尼姑責四十板還俗僧道官革職

停止給發度牒

康熙十五年六月禮部題定查京城直隸各省僧道尼姑
每年開造花名文冊報名請牒照數給發度牒年終將逃
亡事故僧道尼姑度牒查送繳部燒燬今看得報名請牒

者甚多按缺繳部者甚少况僧道執有度牒遊行無所不
爲若無度牒難以行走今多事之際或有假冒僧道報明
領牒胡行亦未可知相應將京城及直隸各省報明領牒
及給發度牒俱暫行停止俟事平之日再行請

旨將逃亡事故僧道尼姑查明繳部銷燬度牒

禁止聚會

禮部題准京城不許當街搭席棚揚旛掛榜及行香取水
如有違禁者僧道責二十板爲民僧道官革職延請道
念經之家本部治以重罪

歷年禁止皇城內念經不許用大號喇叭止許用本等音
樂如違各治罪

歷年通行直隸各省禁止邪教惑眾并男女聚會燒香張
幟鳴鑼歛錢號佛等項如有不遵拿送刑部從重治罪
每年三月二十八日 東嶽聖誕本部出示禁約燒香人
等四月初八日 佛誕日本部通行各該衙門及出示曉
諭是日不許跳神還願不理刑名併禁止屠宰

番經廠漢經廠通經廠大西天廠大光明殿元靈宮景山
關帝廟嘛噶囉廟德壽寺萬善殿四大王廟經板庫太
監大光明殿舊道士天元閣 欽安殿太監僧道等每年
四季將應支銀米併供 佛香燭菓品等項預期造冊送
部本部用印鈐蓋咨送戶部給發又太監僧道等如有逃
亡事故者該住持太監僧道呈報本部本部移咨戶部扣

除銀米如頂補亦係該住持太監僧道等呈稟本部或行
縣取或責令該住持自行保舉呈堂准補行文戶部開支
銀米

禁買太監

康熙三十一年八月禮部咨查康熙二十二年題定王以
下入八分公主以上公主以下多羅貝勒女郡主以上私
買太監收用暫行停止俟

宮內需用太監足用之日赴部來說方行准買至於縣郡乘
入八分公以下宗室覺羅內外文武大臣官員以下及民
應不許用太監等因通行在案但通行年久或有不遵私
行買賣亦未可定相應再行通行八旗及包衣佐領併直

隸各省不許私行買賣倘有不遵私行買賣者或本部查出或傍人出首將買主及賣太監之人併該管大臣官員一併題叅交與該部院議處

太監投認取結

康熙三十四年二月禮部題定凡太監投認臣部者行查該地方取具印結送內務府等因奉

旨着會同內務府具奏欽此嗣後凡太監投認禮部問明住址年歲卽送內務府一面行令該地方取結送部

用太監名數

康熙四十年五月禮部題定議得

上賜與王貝勒公主格格等太監不議外親王等各二十五名

世子郡王等各二十名長子貝勒等各十五名貝子等各八名入八分公等各六名公主十名和碩格格五名多羅格格四名固山格格未入八分公三名民公侯伯一品大臣二名二品大臣一名

請巫師治病

康熙元年九月本部題准如滿洲蒙古漢軍凡有邪病請巫師道士醫治領巫師道士稟知各都統都統用印文送部醫治如有違者照

太宗年間定例交付刑部正法

天主堂照舊存留

康熙三十一年二月禮部題准議得西洋人仰慕

聖化由萬里航海而來見今治曆日造軍器火炮並無爲惡亂
行之處又並非左道惑衆喇嘛僧道等寺廟尚容人燒香
行走相應將各處天主堂仍照舊存留凡進香供奉之人
仍許照常行走不必禁止



